

INSAIT:



English-

The law is an ass, and so are we - P4

Pidgin-

Loa em wanpela donki, na mipela olgeta wankain - P5

Tok wanbel kamap

... Sainim MOA bai strongim

Veronica Hatutasi i raitim

OL DOKTA long kantri bai go bek long wok tude bihain long ol i lusim wok long las wik Fraide Mas 18.

Dispela i bihainim saining bilong Memoremundum ov Agrimen (MOA) bai kamap

long tude, Fonde.

Siaman bilong Industriyel Komiti bilong PNG Nesanel Doktas Asosiesen (NDA), Dokta Thomas Vinit, i bin tokim Wantok Niuspepa.

Moa stori long pes 2

Dispela poto ripota JAMES KILA i kisim i soim tripela liklik pikinini i amamas tru na trip antap long wanpela plastik boks arere long wanpela sip long Binnem poin long Madang taun. Dispela ol pikinini na ol arapela manmeri bilong Madang taun i save amamas long gutpela nambis na ples em nais tru long Madang taun we planti naispela bilas i stap. Long dispela wik *Wantok Niuspepa* i glasim Madang provins wantaim wanpela 20-pes saplimen we i lukluk long sampela ol developmen i kamap insait long provins.

Poto: James Kila



Kisim fri kupon bilong Globe Rais insait!

Ol Madang ridas tasol!

Glasim Madang Provins
Saplimen Insait!

FRI
bihain long 2pela SMS

Salim tupela sms. kisim 18 Fri sms



Kisim 20 teks long prais lo tupela teks tasol!

Sapos yu salim tupela teks namel long 7am monin na 9:59pm nait bai yu kisim 18 teks fri behain long em.

Digicel

Bilpele, Storpela moa Network bilong PNG.

Digicel Terns na Kondisen bai stap.

GLOBE

...the perfect choice

VITAMIN ENRICHED

More Easy, More Tasty, More Healthy.



Mama gat nem long mekim ti na kofi



HAP MAMA: Mama Semi Sao, meri bilong mekim ti na kopi bai yu no inap abrusim. *Poto: Nicky Bernard*

Nicky Bernard i raitim

YUMI save gat kainkain wei long mekim kofi na ti long dring taim yumi laik stret long dring, sampela taim bai yumi no laikim sugar o susu long go wantaim kofi o ti bilong yumi, taim yumi yet mekim bai yumi save long stail bilong mekim bilong yumi.

Long balus, ol lain i save wok insait long balus, save askim yumi long wanem kain kofi yu laikim o ti yu laikim, na ol bai givim sugar long yu na yu yet bai tanim long mekim swit o long tes bilong yu.

Long wik i go pinis, *Wantok* i raun go long wanpela bikipela opis long Waigani

long wanpela bung, long dispela opis i gat wanpela mama husat save mekim kofi o ti bilong bos bilong em, na em askim ol lain nus lain long wanem kain kofi o ti ol laikim na em mekim bilong ol, sampela ol mekim bilong ol yet.

Potografa bilong *Wantok* i larim dispela mama long mekim kofi bilong em, mama i askim long wanem kain kofi em i laikim.

Dispela kemra man i kisim tupela kap kofi klostu klostu, long wanem dispela mama ya i bihain laik bilong em stret.

Dispela mama nem bilong em Semi Sao, em bilong liklik ples Kokopi long Kainantu insait long Isten

Hailens Provins.

Em i wok wantaim opis bilong Praim Minista long 7-pela krismas olgeta, bihain ol ritensim em na em go wok long Boroko Motos insait long Mosbi siti yet. Bi-hain long narapela 7-pela krismas wantaim Boroko Motos, olupela bos bilong em i painim em na kisim em go bik na wok wantaim em long DPM long 2004 long namba 4 mun.

Mama Semi stap yet wantaim DPM na long yia i go pinis long krismas, DPM i amamasim wantaim em long wanpela bones o spesol win mani long wei em save mekim ti na kofi.

Mama Semi i tokim *Wantok* olsem, maski DPM i gat planti sia bilong sindaun tasol em bai no inap paul sapos wanem kain ti o kofi yu laikim, sapos yu laikim wanem kain kofi o ti em bai mekim stret long laik bilong yu.

Em i tok bos bilong em nau i wok long painim em longpela taim stret inap 2004 em lukim em na kisim em go bek. "Bos bilong mi save laikim mi long mekim kofi bilong em, na mi yet save long wei bilong mekim kofi bilong em." Semi i tok.

Planti wait manmeri save tu long han bilong Semi taim em mekim kofi o ti, olsem na olsave askim em long mekim kofi o ti bilong ol klostu klostu taim ol i gat bung long DPM opis.

Dispela yia nau em bai 7-pela yia bilong mama Semi long wok wantaim bos bilong em na DPM, dispela yia tu bai lukim mama Semi i wok olsem kofi na ti gel inap 21 krismas olgeta. Seven pela wantaim praim minista dipatmen, 7-pela yia wantaim Boroko Motors, na 7-pela yia wantaim DPM opis.

Mama Semi laik tok tenkyu long bos bilong em John Kali, na ol wok manmeri bilong DPM long helpim taim em stat wok gen wantaim DPM.

Tok wanbel kamap ...Sainim MOA bai strongim

I kam long pes 1

Veronica Hatutasi i raitim

"Mipela i amamas olsem Helt Minista, Sasa Zibe, i kam bungim mipela na bihainim ol toktok mipela i holim wantaim em, sampela gutpela samting i kamap long stretim wari bilong ol dokta na ol i ken go bek long wok.

"Tasol ol dokta bai stap aut yet long wok inap mipela (NDA) i sainim MOA wantaim Dipatmen bilong Pesenel Menesmen (DPM)," Dokta Vinit i tok.

Dispela em i namba 6 de we moa long 500 dokta i memba bilong PNG NDA long olgeta haus sik long kantri i no stap long wok, bihain ol i bin lusim wok long las wik Fraide.

I kam inap nau, liklik lain dokta i wok wantaim ol nes long lukautim ol sik manmeri long ol haus sik na ol imejensi wod. Ol helt senta na ol etpos long ol taun na ol ruel eria em ol nes na ol komyuniti helt woklain i lwok na ukautim i stap.

Saining bilong MOA bai edresim ol samting we ol dokta i laikim olsem ol salari o pei peket na ol alauwens bilong ol dokta we ol i bin tok orait long ol long 2007 yet na gen long mun Janueri las yia.

Dokta Vinit i tok NDA i amamas olsem Min ista Zibe i wanbel long MOA we ol bai sainim long tude na tu, em i promisim ol olsem em i painim pinis mani long Helt Dipatmen long stretim ol dokta long en.

Hevi long komyunikesen namel long ol NDA eksekutiv, sekreteri bilong Dipatmen bilong Pesenel Menesmen (DPM) em John Kali na Helt Sekreteri, Dokta Clement Malau, i wanpela bikipela samting i

skruim dispela lusim wok bilong ol dokta i kam inap nau.

"Ol pati i stap insait long dispela hevi i mas sindaun na toktok wantaim long stretim hevi bikos ol sik manmeri i bungim hevi taim ol dokta i no wok," wanpela wokman long haus sik i tok.

Dokta Malau na Mista Kali i traime hat long dispela wik long bung wantaim ol Presiden bilong NDA, Dokta Kauve Pomat na eksekutiv bilong em, tasol ol (NDA) i no go.

Long aste moning (Trinde), ol NDA eksekutiv i bin bung wantaim Pablik Sevis Minista Moses Maladina, Mista Kali, Dokta Malau, Presiden bilong Pablik Employis Asosiesen (PEA, Michael Malabag na Tred Yunien Presiden, John Paska.

Minista Maladina i laikim bai ol i stretim dispela hevi bilong ol dokta hariap na em i askim ol long go bek long wok.

"Minista Maladina i tok em no laik toktok long ol samting we ol i pulim i kam inap nau, lus tingting long ol.

"Mi laik go het na lukluk long ol bikipela samting na painim rot long stretim ol. Yupela i mas toktok hariap, bungim ol wantaim na kisim i go long DPM i ken stretim. Sapos nogat, mi ken kisim i go long Kabinet long lukim na givim tok orait long ol. Dispela em long salari o pei peket, ol narapela fainens samting na polisi em bai olgeta ol i lukluk long ol na edresim, " Dispela e mol toktok Mista Maladina i mekim na Mista Kali i autim.

Na Mista Maladina i askim strong ol dokta bilong go bek long wok, tasol ol dokta i tok ol bai lukim em tude 3 kilok apinun.

Planti lain i sapotim lusim wok ol dokta i mekim na tok ol dokta i mekim dispela i gat gutpela as tingting long en bikos ol (dokta) i save mekim bikipela wok long helpim na sevim laip bilong ol manmeri.

Ol yunien bilong ol gavman dipatmen olsem PNG Komyunikesens Wokas Yunien (CWA), Maritaim na Trenspot Wokas Yunien (MTWA), PNG Benks na Fainensel Institusen Wokas Yunien (PNGBFTW), PNG Komyuniti Helt Wokas Asosiesen, PNG Neses Asosiesen na ol narapela moa i sapotim ol dokta long lusim wok.

Long wankain taim, kot long las wik Fraide yet i bin tok olsem ol dokta i no bihainim stretpela lo na lusim wok na olsem, ol i mas go bek long wok. Tasol ol dokta i no harim dispela na ol i sanap strong long askim bilong ol long stretim ol pe na ol alauwens bilong ol long yia 2007 i kam inap nau na ol i strongim lusim wok bilong ol.

Long Tunde moning, Mista Kali i bin mekim klia long ol niuslain olsem ol dokta i no bin bihainim lo i stap we i tok long lusim wok, namba wan samting ol yunien memba i mas mekim em long holim sikret balot pastaim. Na long pinisim olgeta eria bilong stretim toktok bipo ol i lukluk long holim stop wok o lusim wok.

Wantok i no bin nap long kisim toktok long Stet Solisita wanem disisen kot i mekim long aste moning long rot lusim wok bilong ol dokta i go long em bikos aninit long Seksen 54 bilong Pablik Sevis Menesmen Ekt, lusim wok ya i brukim lo.



NO NAP SURIK: Ol eksekutiv memba bilong NDA i bung na wanbel long lusim wok. *Poto: Veronica Hatutasi*

TOK SORI



Menesmen na ol wokmanmeri bilong *Word Publishing Kampani, Wantok Niuspepa* i salim bikipela sori i go long femili na ol bratasusa bilong **Leit Peku Pilimbo**

Leit Peku Pilimbo i bin wok wantaim *Wantok Niuspepa* olsem wanpela yangpela ripota bihain long em i pinisim skul long Divain Wod Yunivesti na lusim na go wok long ol arapela midia kampani.

Em i lusim meri bilong em Elsy, tupela pikinini man, Malipu na Tumil Pilimbo. God i stap wantaim yupela long dispela de bilong belhevi.

Malolo Oltaim!



Nupela sip bilong Boda Developmen Atoriti (BDA) MV Milen Be Atolls i go sua long Mosbi long aste. *Poto: Nicky Bernard*

Minista Maladina lonsim narapela sip bilong BDA “MV Milen Be Atolls”

James Kila i raitim

OL RUREL pipel long ol liklik ailan insait long Milen Be provins bai i gat wanpela sip long sevim ol long karim kopra, ol stua kaikai na tu bringim ol narapela gavman sevises nau i go long ples bilong ol.

Dispela i kamap bihain long Minista bilong Pablik Sevis na Memba bilong Esa'ala, Moses Maladina long aste (Trinde) i lonsim nupela sip bilong Boda Dvelopmen Atoriti (BDA) ol i kolim nem bilong em ' MV Milne Bay Atolls'.

Lonsing bilong dispela nupela sip em hap wok bilong BDA insait long rol-aut program bilong em long sevim ol provins we i stap arere long boda bilong Papua Niugini wantaim ol arapela kantri.

BDA i bin kamap bihain long Nesanel Gavman aninit long plen bilong Praim Minista, Se Michael Somare i laik lukim olsem ol provins we i stap long boda i ken i gat gutpela infrastraksa o samting bilong helpim ol yet long sait bilong sosel na ekonomik developmen.

Minista Maladina i tokaut olsem dispela sip MV Milen Be Atolls bai i lukim olsem nem bi-



Pablik Sevis Minista, Moses Maladina i stap long stia bilong MV Milen Be Atolls bihain long lonsing. *Poto: Nicky Bernard*

long em bai i senis i go olsem 'MV Esa'ala 1'.

Em i tu insait long dispela yia em bai bringim narapela sip gen em ol bai kolim nem bilong em Esa'ala 2.

Eksekutiv Dairekta Operesins bilong BDA, Barnabas Neausemale i tok olsem insait long 2-pela yia taim BDA i bin kamap na staitim wok bilong en, em i kamap wantaim dispela ol gutpela rol-aut program bilong en long sevim ol liklik ol ailan na ples we i

longwe tru long ol bikpela taun na planti taim ol manmeri i no save kisim ol gavman sevises.

Em i tok BDA long taim em i kamap i bihainim 3-pela bikpela as tingting o pos long sait bilong developmen em long sosel developmen long ol boda provins, namba tu em long infrastraksa developmen long ol boda provins na namba tri em ekonomik developmen long ol boda provins

Mista Neausemale i tok olsem long nau yet 5-pela bot em BDA i lonsim pinis i stap long sevim ol pipel bilong Wes na Is Sepik, Manus, Wes Nu Briten na Manus. Dispela rol-aut program bilong ol sip em i stap insait long sosel na ekonomik rol-aut program bilong BDA.

Em i tokaut tu olsem bikpela samting em BDA i tingting planti long en nau em mani o fainens long lukim olsem dispela program bilong operesin bilong sip i go het.

Em i mekim singaut tu i go long Nesanel Gavman long putim mani long lukim olsem dispela program bilong sip i ron long sevim ol pipel long ol rurel na liklik ailan long ol boda provins i mas go het.

Mista Neausemale i tok olsem long taim BDA i bin lonsim MV Manus Atolls long Manus, planti pipel i tokaut olsem ol i amamas tru bikos kain sip sevis i ken bringim planti helpim long ol liklik ailan bikos planti taim turangu ol manmeri long dispela ailan i no save kisim ol gavman sevises na tu planti i save gat bikpela nid tru long sip sevis i helpim ol long bringim ol kes krop olsem kopra i goaut long maket na ol narapela sevis.

Maggi

Hariap Long Kukim, Gutpela Long Kaikai

The law is an ass, and so are we

THE front page of a local newspaper carried the picture of a smiling Prime Minister, Sir Michael Somare, after the announcement by the leadership tribunal that he was free to go, despite the tribunal finding that he concealed material facts in his annual returns submitted to the Ombudsman Commission.

Two of the Tribunal members were prepared to overlook the fact that of the 25 charges, he was convicted of 13 and most of the other 12 charges were considered redundant.

However, one dissenting tribunal member considered that the omission was of a serious and culpable nature, given that Section 4(6)(b) of the Leadership Code provided that a leader who knowingly, recklessly or negligently gives the Ombudsman Commission a statement that is "false, misleading or incomplete in a material particular" is guilty of misconduct in public office.

The biggest hurdle to a healthy constitutional democracy in this country is our unhealthy perception of our individual roles as politicians and the high expectations of public offices that we aspire to in our lives as politicians. There is a clear distinction between the two, namely, that the individual politician is not the office, and vice versa.

However, in this country, and in many other third rate democracies like ours, there is an unhappy marriage between the two, as the politician tries to and successfully forces a merger to take place.

The effect of such a merger is that the high public office loses its status as a "public" office, and is made to be seen as if it were a mere appendix to the personality holding that office. By that we mean, the public office has been personalized by the office holder so that as time passes, it becomes harder and harder to maintain the distinction between the person and the office.

In our view, the two should be kept separate at all times. Whatever quality of leadership an individual takes to an office ought to enhance that office so that the integrity of that office is firstly maintained and secondly,



the individual office holder must not allow his personal integrity to be questioned in any way during his tenure of office. The moment the personal integrity of the individual is questioned, then it becomes an issue of whether the individual is a fit and proper person to hold such high office.

This is why in many established democracies like England, America and Australia where the integrity of an office holder is put in issue, there is an automatic resignation by the office holder. The office holder will not "hang on" to office and publicly maintain his innocence. He will resign in shame and if he is a politician, he will also resign as a politician.

Sadly, in this country, we have created a culture of "hangers-on"; these are people who have outlived their usefulness, but will hang on to public offices because they can no longer distinguish between their impaired personal integrity and the integrity of that public office.

How does the law deal with such people? There is no easy answer to this question.

The law is not an impersonal weapon with any degree of potency. It is more of an "ideal" and "expectancy" or an "implement" of hope without any inherent sense of cohesion to force the issue. For its efficacy, the law relies on the lawmakers, the law administrators and the impartial adjudicators to uphold its integrity and to imbibe it with potency so that it serves its principal function, namely, "delivery of justice" with an equal degree of cohesion.

In other words, the law requires personal input from the above category of people so

that it can be seen to perform its function. This means the law is only as good as the people who make the laws, people who administer the laws, and the people who adjudicate on the law. And where these people are corrupt, the law also becomes corrupted and is openly used as a tool for oppression of the very people who require its protection. This is why many have commented that the law is an ass. And that is not far from the truth.

THEREFORE, in order to maintain its integrity as a "vehicle for dispensation of justice", the law requires its lawmakers to be its agents to ensure that only just laws are made. In order to maintain its degree of fairness to all, the law requires its administrators to exercise caution in the way the law is administered so that the administrators do not become judges, juries and executioners at the same time. And as for the judiciary, the judges must be impartial and be seen to be impartial.

However, it is of utmost importance that the Judge must be guided by the law and the law alone and in the manner spelt out by its procedures. This is what due process is all about. We call it the rule of law and the Americans call it due process. Sadly, in this country, our judges are now becoming the law unto themselves and in their endeavour to dispense justice, they have forgotten the long established notion that justice is according to law and not vice versa. Now they are implementing their personal sense of justice outside the law and its procedures.

The law, in essence, is all about impartial justice without a face. The law is not all about what is in the Law Text Books and in the Statute Books. The law is an idea, a notion, or a theory. The law is an attempt to regulate transactions, issues or conduct of human beings where personality traits come to play a major part, starting with the litigants and their lawyers and witnesses and finally the judges slot in their contribution so what comes out at the other end of the tunnel has no resemblance to that which made the entry.

It is a concoction of facts, innuendoes, lies and fabrication and plenty of misconceptions.

How does one judge which version is a closer resemblance to the truth and under the circumstances, what is truth?

King Solomon, in his wisdom, had little difficulty dealing with two women contesting motherhood of an infant presented before him. He was able to discern the truth and thus dispensed justice forthwith. Here we are talking about wisdom, discernment, truth and justice. These are not variables. These are soul qualities.

Of the five Books of Moses, Deuteronomy is an embodiment of the Law which sought to quench the human thirst or longing for retribution but in its essence, it was seemingly

an open book justice system that carried the flag of impartiality. The most striking aspect of this body of law, was its acceptance, never mind the consequence of breach such as death by stoning. The law was accepted and enforced vigorously.

Thus, when Jesus made his entry into the system, he was seen as a renegade because he was not seen to be practicing the customs required of the Jewish society. So on one occasion he was asked words to the effect if he came to change or destroy the law and his reported response is very heartening. He said something to the effect, "no, I have not come to change or destroy the law. I have come to fulfil the law".

If one looks back at Deuteronomy, one will see that the underlying notion is vengeance characterized by the principle, 'an eye for an eye and tooth for a tooth'. There is no middle road to take. However, when Jesus came he was preaching a message of salvation that suggested a new way of looking at the written law. For instance, he rescued Mary Magdalene, caught red handed in adultery by making a simple statement: "Let him who is without sin cast the first stone."

And what was this message for the Jews? In his related response to the question whether he came to destroy the law, Jesus told the Jews that Moses gave them the law suited to their nature as hard hearted, vengeance seekers to pacify them in their blind quest, but sadly it has become an end in itself.

Easily this could also apply to us. We have a constitution that sets up a political system with a comprehensive administrative structure empowered to perform its functions as a single unit. However, straight after independence the rot set in and in the last 38-39 years since then, the rot has crystallized and it has now come to a stage where the system can no longer perform its function. And if we were to make it work, it would be like flogging a dead horse and hoping that it would gallop one step in the right direction.

We have all become Pharisees and scribes enforcing the law with vigour and almost with impunity when it suits us and then preferring to ignore the law when personal circumstances do not suit vigorous enforcement. Thus, in our misguided quest for justice, we engage in misinterpretation and misapplication of the law.

Our laws have lost their purpose. It is now the law unto itself. It is a meaningless rot perpetrated by another rot, thus the law has now become a rot upon a rot. The ship of State has lost its compass on high seas. The captain is feasting in his cabin with the crew and the passengers have lost the will to survive as they vegetate in the hatch.

Wake up Papua New Guinea! The world has moved far beyond, and here we are, still nursing the rot.

Loa em i wanpela donki, na mipela olgeta wankain

FRAN pes bilong wanpela lokol niuspepa i bin gat poto bilong Praim Minista Sir Michael Somare i smail na amamas, bihain long lidasip traibunel i tokaut olsem em i fri, maski traibunel yet i painimaut olsem em i bin haitim sampela ol samting insait long anuel ritens bilong em i go long Ombudsman Komisen.

Tupela long ol Traibunel memba i bin orait long abrusim luksave olsem long 25 sas Chief i kisim, em i bin asua na kisim sas long 13, na planti long ol arapela 12-pela sas, ol i tok i nogat strong bilong ol.

Tasol, wanpela traibunel memba i bin ting olsem dispela asua bilong PM em i wanpela bikpela asua tru, aninit long luksave bilong Seksen 4(6)(b) bilong Lidasip Koud we i tok olsem husat lida i gat save, i no mekim stret o i paul na abrus long givim Ombudsman Komisen long toktok o stetmen we i "false, misleading or incomplete in a material particular" (tok giaman, tok paulim o i no pinis gut) i asua pinis na i mekim paul pasin insait long opis bilong pablik.

Namba wan bikpela birua long wanpela helti konstitusenal demokrasi insait long dispela kantri, em paul luksave yumi gat long wan wan ol wok bilong yumi olsem ol politisen, na ol bikpela askim na luksave i pas long ol pablik opis, we ol lida bilong yumi i save inapim. I gat klia luksave tru long dispela tupela samting. Olsem, politisen yet i no opis, na opis i no politisen.

Tasol long dispela kantri, na wankain long planti ol arapela liklik demokrasi olsem bilong yumi, i gat wanpela paul pasin poroman namel long tupela, taim politisen i suvim het long bungim dispela tupela samting.

Taim dispela bung i kamap, em nau, pablik opis bai lusim luksave olsem wanpela "pablik" opis, na bai kamap olsem wanpela hap han bilong husat man i sindaun long dispela opis.

Mipela i tok olsem long minim olsem dispela man i stap long dispela opis, nau i tanim dispela opis i kamap samting bilong em yet. Olsem na taim em i sindaun longpela taim long dispela opis, em i hat moa long em i luksave long opis i wanem, na em i wanem long dispela opis.



Long lukluk bilong mipela, dispela tupela samting i mas stap long ol yet olgeta taim. Maski wanem kain strongpela pasin lidasip man o meri i karim i go insait long dispela opis long strongim wok bilong en, oltaim bai gutnem na luksave bilong opis bai stap namba wan. Namba tu, dispela opisa i noken larim gutnem bilong em yet long kisim askim taim em i stap insait long dispela opis. Long namba wan taim gutnem bilong dispela opisa i kisim askim, em nau i kamapim askim sapos dispela opisa i gat inap gutnem na gutpela pasin bilong holim kain opis olsem, insait long kantri.

Olsem na long planti ol bikpela demokrasi olsem long Ingran, Amerika, na Australia, we gutnem na luksave bilong man i sindaun long opis i save krangi na pulim askim, wantu tasol bai em i lusim risain lusim dispela opis. Man i lukautim opis bai no inap "hangamap" long opis na tokaut long pablik olsem nem bilong em i gutpela yet. Em bai sem na risain, na sapos em i wanpela politisen, em bai lusim wok politisen tu.

Turangu, long dispela kantri, mipela i kamapim pinis wanpela pasin bilong "hangamap"; ol dispela lain em ol lain husat i abrusim wok mak bilong ol pinis, tasol ol i hangamap yet long pablik opis bikos ol i no inap luksave moa long nem bilong ol i bagarap, na nem bilong pablik opis.

Olsem wanem tru bai loa i mekimsave long ol dispela kain lain? I nogat wanpela isi bekim long dipela askim.

Loa i no wanpela kain pait samting i gat pawa. Em i moa olsem wanpela kain 'bilip' na 'laik' o wanpela 'samting' bilong strongim bilip we bai em i no inap long strongim laik bilong em yet. Long wok strong, loa i save lukluk long ol lain i save mekim loa, ol loa administreta, na ol gutpela manmeri long strongim gutnem na luksave em

i gat. Long wankain taim, loa i save wetim ol dispela lain long givim strong long en, bai em i ken mekim namba wan bikpela wok na astingting bilong en, em bilong 'givim na strongim jastis' wantaim gutpela bel na tingting.

I olsem, loa i nidim gutpela tingting na luksave i mas kam long ol lain mipela i kolim pinis antap. Bai em i ken soim klia olsem em i mekim wok bilong em. Dispela i minim olsem loa i gutpela long mak bilong ol lain manmeri husat i mekim ol loa, ol lain manmeri i save karimaut na strongim ol dispela loa, na ol lain husat i save givim jasmen bihainim ol dispela loa.

Na sapos ol dispela lain i pundaun long pasin korapsen pinis, loa bai kamap olsem samting bilong mekim pasin korapsen, we ol man i yusim long daunim nating ol gutpela manmeri, o ol lain husat loa i mas banisim ol. Olsem na planti taim bai yu harim dispela tok: 'Loa i olsem wanpela donki. Tru tumas, dispela tok i no abrus.

Em nau, long strongim dispela gutnem na luksave olsem wanpela 'karis bilong karimaut jastis', loa i nidim ol lain bilong mekim ol loa long kamap ol ejen bilong en, na mekim ol gutpela loa tasol.

Long holim strong wankain luksave long olgeta, loa i nidim ol administreta bilong en long sekim gut pastaim rot bilong yusim ol loa, bai ol administreta bilong loa i no kamap ol jas, juri na eksekusena long wanpela taim tasol. Na long judisari, ol jas i mas sanap strong, na ol i mas soim klia piksa olsem ol i stap namel man.

Tasol moa yet, ol jas i mas bihainim stia bilong loa na loa yet na bihainim stret ol rot ol stia wok bilong em i stap. Dispela em ol i save kolim 'due process'. Mipela long hia mipela i kolim 'rule of law', na ol Amerika i save kolim 'due process'.

Turangu, long dispela kantri, ol jas bilong yumi nau i wok kamap ol loa ol yet, na long taim ol i givim jastis, ol i lus tingting long bikpela astingting olsem jastis, em i bihainim loa. I no loa i bihainim jastis. Nau, ol i wok long karimaut luksave ol yet i gat long jastis em i wanem, ausait long banis bilong loa na ol stia bilong en.

Loa, long as tru bilong en, em i jastis i nogat pes. Loa i no

samting i stap insait long ol bikpela teksbuk bilong loa nainsait long ol Stetiut Buk tasol. Loa em i wanpela tingting, wanpela luksave, o stia bilong tingting. Loa i save traim long skelim ol wok bisnis, hevi o pasin bilong ol man we wan wan man i gat pasin bilong em yet. Stat wantaim ol lain i kirapim kot na ol loya bilong ol na ol witness, na bihain, ol jas long givim tingting bilong ol. Olsem na kaikai bilong olgeta dispela tingting i bung wantaim, i no wankain long samting i kirapim kot namba wan taim.

Em i kamap ol namba na stori, ol tok krangi, ol tok giaman, ol tok hait na planti ol paul tingting na luksave.

Bai yumi save wanem tok i tru, na wanem tok i klostu moa long samting i stap tru, na bihainim wanem ol sindaun. Wanem samting em i tok tru?

King Solomon, long save em i gat, i bin stretim kros bilong tupela meri i resis olsem ol i mama bilong wanpela liklik bebi. Taim ol i kamap long ai bilong Solomon, em i bin luksave tru long ol tok tru na tok giaman. Olsem na em i hariap tasol na stretim dispela hevi. Long dispela, loa em i wisdom o tingsave, luksave, tok tru, na jastis.

Ol dispela samting, i nogat hap hap bilong en. Ol i samting i kam long bel tru bilong man.

Long faivpela buk Moses i raitim, Diuteronomi em i bungim olgeta loa i kamap long inapim askim na laik bilong man long kisim luksave long rong ol i kisim. Olsem na em i bin wanpela open buk jastis sistem we i karim nating nem bilong tru tru jastis.

Wanpela samting long dispela ol loa, em luksave ol manmeri i givim long en. Maski long kain birua pasin na tingting i stap long ol loa olsem stonim man long kilim em.

Ol man yet i luksave long loa, na ol i strongim na bihainim tasol.

Olsem na taim Jisas i kamap insait long sistem, ol i lukim em olsem wanpela ausait man, bikos ol i lukim olsem em i no bihainim ol kastom loa bilong ol Ju. Em nau, wanpela taim, ol i askim em sapos em i kam long senisim o rausim loa. Bekim bilong em i gat bikpela astingting tru. Em i tok olsem, "nogat, mi

no kam long senisim o rausim loa. Mi kam long inapim loa."

Sapos yu lukluk bek long Diuteronomi, yu bai lukim olsem astingting bilong ol loa em pasin bilong bekim bek, o 'an eye for an eye and tooth for a tooth'. I nogat namel rot long bihainim. Tasol, taim Jisas i kam, em i tokautim tok salvesen we i toksave long nupela luksave long loa ol i raitim pinis. Olsem, taim em i sevim Maria Magdalen long pasin pamuk, na em i bin tok: "Larim husat man i nogat pekato i tromoi namba wan ston."

Na dispela em i wanem kain toksave i go long ol Ju? Long dispela bekim bilong Jisas, askim i kamap sapos em i kam long rausim loa. Em i tokim ol Ju olsem Moses i bin givim ol loa bihainim pasin bilong ol long pait na bekim bek rong. Tasol ol loa i bin sot long mak bilong gutpela tingting.

Yumi ken lukluk long dispela tu. Mipela i gat wanpela konstitusen o mama loa i sanapim politiks sistem wantaim bikpela administretiv straksa we i gat pawa em yet long mekim wok bilong em.

Tasol, bihain long indipendens, paul pasin i go bikpela, na long las 38 o 39 yia, dispela paul pasin i go strong olgeta na nau, yumi lukim sistem i no inap mekim gut wok bilong em moa. Na sapos yumi laik stretim, em bai olsem yumi paitim wanpela hos i dai pinis, wantaim bilip olsem em bai kirap na wokabaut wanpela step long rot yumi laikim em long wokabaut.

Yumi olgeta i kamap ol farisi na skraib i strongim loa wantaim bikpela laik na taim yumi laikim, bai yumi lusim ol loa bihainim laik na hait sindaun bilong yumi. Olsem, na long traim painim jastis, yumi wok long tanim tok bilong loa, na kamapim paul pasin olsem samting tru.

Ol loa bilong yumi i lusim pinis astingting na aswok bilong ol. Nau loa i stap na stiaim em yet. Sip bilong gavman i lusim stia bilong en pinis long bik solwara. Kepten i kaikai na amamas i stap long kebin bilong em wantaim ol boskru, na ol pasindia i hait na silip gurua i stap long ples bilong slip.

Papua Niugini, kirap nau! Wol i mov i go het pinis, na yumi stap sindaun wantaim sting pasin yet.

10,000 pipel long Nu Ailan bai kisim helpim ...Bikpela san i sotim kaikai na wara

Veronica Hatutasi i raitim

SAMTING olsem 10,000 pipel long Nu Ailan provins bai kisim helpim long kaikai na ol wara kontena long Nesanel Disasta na Imejensi Sevis (NDES) bihainim hevi we bikpela san i kamapim long ol.

Dispela em ol pipel bilong ol liklik ailan komyuniti olsem Musau, Emirau, Tanga, Tabar na sampela hap bilong Namatanai i go olsem long Sen George sanel eria.

Dairekta bilong NDES, Martin Mose, long dispela wik i tok stat long las yia yet, Niugini Ailans rijen i wok long bungim bagarap long bikpela san we i bagarapim ol gaden kaikai na ol wara i drai.

"Ol lain bilong Musau, Emirau i kisim taim nogut na ol i sot long kaikai na wara long wanem, taim bilong bikpela san i bin stat yet long mun Jun las yia. Liklik ren i stat long pundaun nau, tasol hevi we bikpela san i kamapim i stap yet.

"Mipela bai bai ol rais bek long Trukai Industris depo long Kavieng wantaim manimak bilong K100,000 na ol i ken tilim i go long ol pipel long ol ples we ol i bungim hevi long sot long kaikai. Narapela K50,000 em mipela bai baim ol wara kontena, putim ol long sip na salim i go long ol pipel i kisim na ol i ken putim ol wara bilong dring na kuk long ol," Mista Mose i ok.

Long ol narapela hap olsem Manus we bikpela gurua na sunami long Japan i bin kamapim sampela hevi long ol, Mista Mose i tok long ol ripot we ol i kisim long palamen memba, Joab Pomat, husat i bin raun i go lukim ol ples long notwes kos long Manus, nogat bikpela bagarap i kamap.

"Solwara i bin go insait long ol ailan na ol haus na ol narapela samting, tasol em i go bek gen. Olsem na nogat bikpela bagarap i bin kamap," Mista Mose i tok.

Tasol sampela haus, ol teng wara, welwara na ol narapela samting moa i bin bagarap long dispela haiwara, olsem



Wantok piksa i soim.

Mista Mose i tok Boram Haus sik long Is Sepik provins tasol i bin bungim bikpela hevi liklik na nau ol opisa bilong em i stap long hap long kisim ripot.

Em i tok NDES i no givim helpim yet inap ol opisa i glasim ol bagarap na wokim ripot bilong ol long en.



SLIP KILIM PIKINI-NI: Turangu slip i kilim dispela liklik pikinini na em i slip i stap antap long bet insait long haus we haiwara i bagarapim long notwes kos, Manus provins.

BAGARAP: Papa bilong haus lisoim level haiwara i bin go antap long en na bagarapim ol samting. *Ol Poto: Manus Provinsel Disasta Opis*

BSP Skul kriket progrem winim intanesenel awot

...Pilal long stap fit na helti na awenes

Veronica Hatutasi i raitim

EDUKESAN, helt na komyuniti em tripela eria we Benk Saut Pasifik (BSP) Skul Kriket progrem i laik promotim long pilal na wok program bilong em.

Sif Eksekutyutiv Opisa, Ian Cline, i bin tok long lonsim Skul Kriket progrem 2011 long Salvesen Ami Pramereri skul long las wik Fonde.

Long namba tu yia bilong dispela progrem we BSP i bin kirapim na sponsaim las yia, Mista Cline i tok mak bilong ol sumatin bai go long progrem long dispela yia we 10-pela provins long dispela kantri i stap long en bai go antap namel long 75 na 100,000.

Lons i bin harim olsem BSP Skul Kriket progrem i bin winim ICC Bes Awot long Is Esia na Pasifik Junia Dvelopmen Progrem Awot long narapela 95 kantri we Australia na Nu Silan i

stap insait long en.

"Dispela awot i bikpela samting na i soim olsem progrem bilong mipela i wok na i kisim dispela kain bikpela luksave. Mi bilip olsem yupela em ol bihain taim bilong PNG. Gutpela stori we wol i givim luksave i min olsem bai yumi strongim dispela progrem i go moa yet.

"Mipela i givim tu sampela ikwipmen bilong ol sumatin bilong yusim long kriket progrem long skul na bai skul i save yusim.

"PNG i gat ol gutpela yangpela pipel husat i gat bikpela laik long pilal kriket na dispela ol ikwipmen mipela i lusim long dispela skul bai helpim ol yangpela long kamap ol kriket hiro," Mista Cline i bin tok.

Las yia em bin namba wan taim skul kriket progrem i kirap tasol long PNG, tasol i winim pinis luksave awot.

Kriket PNG Sif

Eksekutyutiv, Bill Leane, i tok PNG i winim dispela ICC awot long Bes Global Junia kriket Dvelopmen Progrem Inisietiv, tingting bilong ol long dispela yia em long kamapim ol progrem we bai kamapim ol gutpela senis long ol provins we ol i ranim progrem long en.

Mist Leane i tok em i wanpela edukesen progrem i tagetim tripela eria olsem edukesen we i ronim 45 minit lessen na skulim ol skil na gutpela pasin i go long ol sumatin long ol skul, helt na eksasais na las long en em, komyuniti we i kisim ol awenes toktok long HIV/AIDS," Mista Leane i tok.

Ol skul i save karimaut kriket progrem olsem hap long Fisiek Edukesen progrem bilong ol.

BSP Benk i givim K275,000 long sponsaim dispela Skul Kriket progrem long 10-pela skul long tripela yia.



BSP SKUL KRIKET 2011 LONS: BSP CEO, Ian Cline na Kriket PNG CEO, Bill Leane, wantaim ol Gret 1 na 2 Salvesen Ami Pramereri skul sumatin i save pilal long Skul Kriket progrem. *Poto: BSP pablik Rilesen opis*

Lapu laik strongim HIV/AIDS manmeri

Paul Zuvani i raitim

PLANTI manmeri i gat hevi bilong sik HIV/AIDS.

Na planti i save tingting planti sapos ol bai kamap orait o nogat. Tasol wanpela man Lanzy Lapu bilong Siassi ailan, Morobe Provins i tok em inap strongim laip bilong ol gen long dispela sik. Em i save yusim bus marasin long mekim orait planti manmeri husat i gat dispela sik. Wanpela bilong ol sik man husat i kamap orait i no longtaim i go pinis em Sakiron Gie, bilong Korobosea, Nesenel Kapitel Distrik. Tude Gie, husat i baragap tru

long dispela sik nau i ken sindaun, wokabaut, ron na toktok gut wantaim ol manmeri.

Las wik dispela ripota long taim em i go raun wantaim Lapu na go lukim Gie, em i slip long bed, na tingting bilong em i paul.

Tasol tupela aua bihain long Lapu i givim marasin long em, Gie i kisim bek tingting bilong em na i sindaun gut.

Na las wiken, dispela ripota i go raun gen wantaim Lapu long sekim Gie, em i stat long wokabaut, ron na kaikai gut.

Long bus marasin em i kisim Gie i tok: "Mi laikim tupela samting gavman i mas mekim hariap. "Em i mas tok orait long kamap

bilong marasin CD4 na Viral Load Machine.

"Sapos em i inap long mekim olsem, planti laip bai seif.

"Mi bilip long dispela bus marasin na mi tok bikpela tenk yu i go long Lanzy long helpim em i givim mi.

"Na mi gat bilip long dispela marasin na i askim ol arapela sik manmeri long go lukim Lanzy na kisim helpim.

"Yu save laip bilong yu i stap long han bilong yu," Gie i tok.

Husat manmeri i laik kisim helpim i ken ringim Lapu long dispela ol telepon namba: 76842552/ 72404113.

Lukautim ai i bikpela samting

LONG GAT gutpela ai na save long lukautim (ai) em i bikpela samting we planti pipel long PNG i no klia long em.

Olsem na long statim raun bilong Palamenteri Sekreteri bilong Pasifik Afeas long Australia, Richard Marles, i kam long PNG, em bin go lukluk raun long PNG Ai Kea Inkoporetet we gavman bilong Australia i sapotim aninit long AusAID.

Visen 2020 em Globol Konsotium bilong Australia i patna wantaim 9-pela ai helt kea oge-naisesen bilong Australia i lukautim dispela progrem long PNG.

Gavman bilong Australia i bin tokaut long Avoidebol Blaines Inisietv o progrem bilong abrusim man i kisim sik bilong ai em long laipas, long yia 2008. Dispela progrem i bilong givim helpim long sait bilong marasin, aiglas na helt kea sevis long ai lwe pipel i baim liklik mani long kisim tritmen.

"Long PNG, konsotium i wok wantaim gavman na ol non gavman oge-naisesen patna long givim aut ol awenes na save i go long pablik long helt bilong ai olsem em i bikpela samting na ol i ken givim sapot long ol progrem.

"Em i skulim tu ol man olsem em i bikpela samting long wan wan long ol long lukautim ai bilong ol na we ol i ken kisim helpim taim ol i gat ai sik," Mista Marles i tok.

Em bin tok konsotium i wok long kamapim ol ai klinik na trening ol woklain bilong PNG long kisim skul na ol woklain bilong kantri yet i ken skruim ai helt kea progrem long ol yia i kam.

Em i tok tu olsem aninit long dispela wok, konsotium i helpim long inapim nesanel helt gol bilong gavman bilong wok bung gut wantaim na helpim long kamapim gut ol ai na lukluk bilong planti manmeri bilong dispela kantri.

Long 4-pela de lukluk raun bilong em long PNG, Mista Marles i bin go long LNG Ges projek eria long Sauten Hailans long soim sapot bilong Australia i kam long PNG long lukim olsem dispela projek i ron gut.

Long Mosbi, Mista Marles i bungim ol Palamen minista na sindaun long wanpela bung wantaim Nesenel Edvaiseri Komiti bilong ol Disabilit lain.

Mista Marles bai raun i go long Bogenvil na bung wantaim Presiden, John Momis, na ol narapela ki memba bilong Atonomes Bogenvil Gavman long toktok long rot bilong Bogenvil i kamap orait i go olsem wanem na ol narapela samting moa.

"Dispela raun i kam long PNG i gutpela sans long strongim gen komitmen bilong sapotim PNG em neiba na longpela taim pren bilong Australia," Mista Marles i tok.

Discrimination o mekim nogut long HIV lain



MI BIN ritim wanpela stori long ol manmeri bilong Amerika i painim wok insait long kantri bilong ol yet. Long aplikesen o pepa bilong skelim manmeri ol i save askim ol long helt bilong ol; ol i gat sampela sik o bagarap long bodi? Na ol i save askim ol long ol i gat sik HIV tu.

Olsem wanem ol i gat dispela askim na ol bai mekim wanem taim ol i kisim bek bekim bilong dispela ol askim? I luk olsem, ol i no laik givim wok long ol lain i HIV pinis. Dispela pasin em i nogut olgeta ol i kolim "discrimination". Man o meri i gat dispela HIV binatang bai painim hat nau long kisim wok mani.

Tok i stap long wol olsem manmeri i HIV pinis i ken winim na mekim wanem kain wok i stap long graun. i nogat tambu long HIV lain i no inap go insait na mekim wanpela wok! Man o meri i ken kamap fama o man bilong pulim pis; i ken kamap nes o dokta, kuskus insait long opis, pasto long lotu, polis o memba bilong palamen. Dispela kain tok i stap "HIV - lain inap mekim olgeta wok" - tasol, taim man o meri aplai long wok i gat narapela stori! Planti ol lain bilong bisnis, pablik na praivet sevis na long lotu tu i no laikim HIV- lain i wok i stap wantaim ol. Wanpela tok long HIV -lain em "Yupela i orait", tasol, narapela tok em "Mipela i les long yupela". Dispela em gijaman pasin tru - ol i kolim "hypocrisy"!

Man i save tok na man i save mekim. Wanem samting yu mekim i save soim wanem samting i stap tru insait long bel bilong yu. Na tok mi harim long wol na komyuniti hia long PNG em wankain - "discrimination" - ol i no laik kam klostu long ol lain i karim hevi long HIV binatang. Tingting i stap em wankain tingting bilong bipo i go long ol "leper". Ol i pret; ol i sem, ol i laik banisim ol i go sindaun long wanpela ailan! Sampela stori nau bi-

long soim tingting i stap tude.

Mi laik stori long mi yet apali long kisim tok orait long go insait long wanpela kantri klostu long yumi. Long kisim dispela "visa,"ol tok mi mas go lukim dokta i skelim mi. Tasol, mi ritim pepa (application form) na mi lukim i gat tok long HIV-tes. Mi go long "Medikol" na nes i kisim blut bilong mi. Dokta o nes i no bin mekim wanpela tok long HIV tes. Olsem na ol i no kisim tok orait long mi long wokim HIV tes. Lo bilong kantri i tok (Hamp Act) ol i mas askim man na man i mas sainim pepa pas-taim na kisim kaunseling tu, bipo ol i wokim HIV tes. Ol i kisim blut nating bilong wokim kaikain tes long laik bilong ol, na mi save ol i wok long HIV -tes tu wantaim. Em olsem, ol i brukim lo bilong kantri na bilong yumi! Na sapos ol i painim man i aplai long "visa" em i gat HIV pinis - sori nau. Nogat visa! Em "discrimination" nau!

Mi stori long komyuniti bilong yumi hia long PNG. Planti ol man na meri na pikinini nating, papa na mama na skul pikinini, ol spots manmeri, planti bisnis man na meri, memba bilong palamen na minista bilong gavman (planti), lida bilong lotu - pris na pasta - na memba bilong olgeta lotu i go i go... na planti lain i wok mani nau insait long Pablik na Praivet sevis.

I klia o nogat wanpela lain o grup inap tok, mipela i klin na yupela i dotim mipela i orait na yupela i nogut. Klostu nau olgeta famili insait long PNG i pilim hevi bikos wanpela bilong ol i kisim binatang bilong HIV. i nogat spes long hipokresi.

Olsem na watpo yumi putim hevi na kain liklik lo bilong banisim dispela ol turangu. Kristen pasin yu no putim hevi long man yu helpim em. Nau taim bilong len, em taim bilong skelim pasin na sindaun bilong yumi. Yu save long wanpela i HIV bai yu mekim wanem long em nau. Sapos yu kristen bai yu sori long em na trai long helpim em. Sapos yu tingting na tok nogut long em na banisim em, yu no kristen! Hypocrites Discriminate!"



KLINIK SINDAUN ANTAP LONG WARA: Wanpela klinik long ples insait long Biskani Soparibeu Lokol Level Gavman eria we haiwara i bagarapim na nau em i sindaun antap long wara. . Poto: Biskani Soparibeu



Yut, Meri na Famili wantaim Lorraine Siraba

Oi Meri na Politikel Lidasip

PLANTI toktok i wok long kamap nau long midia long 22 risev sit bilong ol meri long Palamen. Taim ol meri lida i toktok wantaim ol palamen memba bilong ol long givim sapot na palamen i ken tok oraitim Bil long 22 meri risev sit, planti narapela i laikim ol meri i mas resis olsem ol narapela (man) i mekim.

Em i no wok bilong mi long tok husat i rait na husat i rong, tasol mi ting em i taim long yumi ol vota i klia olsem yumi gat pawa long rot we politikis i ron long dispela kantri. Na tingting gut na makim moa meri i go long palamen long 2012 nesanel ileksen. Mi bilip long lidasip bilong meri, na i no bikos mi meri, tasol histori i soim olsem ol meri i ken kamapim senis.

Taim yumi lukluk long lidasip, i gat samting i narakain ol meri na ol man i ken mekim? Sapos yesa,

wanem ol samting i narakain long lidasip ol meri lida i gat na i wok gut?

Stadi we Caliper and Aurora, em wanpela menesmen konsalting kampani long London, i bin karimaut insait long wanpela yia las yia i soim olsem: "Ol meri lida i glasim gut ol samting, ol i no save givap, ol i strong long mekim wok na maski i gat banis o hevi, ol i redi long mekim dispela wok, skelim wantaim ol man lida. Ol i redi long kain senis i ken kamap na ol i gat moa strong, save na skil long sait bilong toktok, wok o stretim ol wari samting wantaim ol narapela manmeri, skelim wantaim ol man. Dispela i mekim ol meri i ritim na lukim ol samting na kisim infomesen long olgeta sait," stadi i tok.

Planti ol wol lida tude em ol man, tasol ol meri i wok long go insait long wol bilong politikis tu. Na sampela i kamap ol lida bilong ol bikpela na strongpela kantri long wol. Ol meri lida i save wok strong long lukim olsem i gat wok pren namel long ol kantri i stap, freedom, jastis, ikwaliti na gutpela sindaun. Ol meri lida i save wok hat moa yet long kamapim gut laip na sindaun bilong ol grasrut meri, planti we i laikim gutpela helt na edukesen sevis.

Sampela ol lidameri long wol we yumi ken lainim long ol long wanem, ol i kamapim senis em long: Dillman Rouseff, namba wan meri presiden bilong kantri Brasil, em bikpela kantri stret wantaim bikpela populesen na ikonimi long Saut Amerika. Meri ya i bin joinim wanpela paitman ami long pait agensim gavman i no gutpela. Ol bin holim pasin na kalabusim na wokim nogut long em long tupela yia. Taim em i kamaut long kalabus, em i kamap wanpela ikonimis. Olsem pastaim Minista long Main na Eneji, em bin helpim long kisim ilektrisiti o pawa i go long ol ruel eria. Bikpela lukluk bilong en em long katim moa mani i go long helt, edukesen na rot. Dispela em i laik mekim long rot we gavman i gat moa kontrol long mani wel (oil) i kamapim.

Ellen Johnson-Sirleaf em namba wan meri presiden bilong kantri Liberia we i kisim dispela wok long yia 2005. Em bin go long kalabus tupela taim bikos em i woki kempain agensim ol foma dikteta lida i bin go pas long kantri. Em i wok strong long agensim korapsen na long kamapim gut laip na sindaun, helt, edukesen na humen rait bilong ol meri. Bikos long ol gutpela developmen wok bilong em, planti kantri i kenselim o rausim ol dinaw we Liberia i gat long ol.

Long PNG yet, yumi luksave ol meri i bin stap long palamen na wanpela meri tasol i stap nau long Palamen, em Dame Carol Kidu, long bikpela kontribusen em i mekim long developmen bilong ol meri, pikinini na ol komyuniti long kantri long sampela ol progrem na projek olsem strongim lo long lukautim ol rait bilong ol, putim moa meri long politikis kamapim ol progrem we i kamapim gut welfea bilong ol famili.

Wantaim bikpela mani PNG bai lukim long PNG-LNG Ges Projek, em i bikpela samting long kantri i mas gat ol man na meri wantaim long palamen bikos tupela sait wantaim i ken mekim ol disisen we bai lukim olsem mani em ol bai tilim gut long kamapim ol rot, bris, ples balus na ol samting olsem bai helpim olgeta manmeri na i no wanpela grup tasol.

Hatwok na redi gut i karim kaikai

Veronica Hatutasi i raitim

WANPELA yangpela meri loya bilong dispela kantri i wanpela long tripela jas we long tupela wik i go pinis tasol em ol i makim ol long kamap jas long Nesanel na Suprim Kot bilong PNG.

Dispela em loya na nau i kamap Jastis, Jacinta Murray.

Meri Wantok i bin bungim loya na nupela jastis, Jacinta, na stori wantaim em.

"Long laip bilong mi, mi no bin ting olsem wanpela de bai mi kamap wanpela jas. Na taim ol i askim mi long kisim dispela wok long 2004 yet, mi no tingting planti long en, na mi bin lap tasol na tok olsem, mi yangpela tumas long kisim dispela wok long dispela (2004) taim.

"Tasol namel long mun Novemba las yia na mi kisim gen ofa long kisim dispela. Dispela em taim Sif Jastis i singautim mi long opis na em i tok "yumi laikim moa jas long dispela kantri." Mi bin ting olsem mi go long intaviu, tasol em i tok, "mipela i laikim yu long wok na bai yu kam.

"Taim em i tok olsem, mi bin pret liklik, tasol bihain mi toktok wantaim famili bilong mi, mi bin tok, orait, mi ken mekim dispela wok na nau mi kisim long en," Jacinta i tok.

Jacinta i marit long wanpela wanskul loya man, Tim Dawidi, em I bilong Bogenvil na Finsafen long Morobe provins em i wok olsem ligel opisa wantaim Oil Search kampani. Tupela i gat tupela pikinini meri. Timaima i wokim Gret 5 na liklik Erica i stap long priskul. Tasol ol i gat ol narapela pikinini bilong ol susa, brata na kandere husat ol i kisim ol na lukautim ol olsem ol trupela pikinini bilong ol.

Kairiru Ailan long Is Sepik em i asples bilong Jacinta. Em i namba 11 long 13-pela pikinini, tasol taim em i liklik yet, bikpela brata bilong em husat i wanpela loya tu, Moses Murray, i bin kisim em long ples i kam long Mosbi na lukautim em olsem pikinini stret bilong em wantaim ol narapela pikinini bilong em. Praimeri skul bilong em i bin wokim long Nesanel Kapitel Distrik, Hai skul long Marienvil Katolik Gels Hai skul bilong ol meri long Bomana, sekonderi skul long Nu Silan bihain em bin winim wanpela skolasip na bihain em bin kam bek long PNG na stadim lo long Yunivesiti bilong PNG. Long yia 1997, em na man bilong em tupela i bin pinisim skul loya bilong ol.

Long wok sait, em bin wok wantaim wanpela biknem PNG loya kampani, Henao Loyas, olsem Asosiet loya, sinia asosiet loya na patna long kampani. Taim em i wok yet wantaim Henao Loyas, em bin go skul long Viktoria, Australia, long tupela yia na kisim onoreri edmisen long Viktoria Ba (Kot) bihain em i pinisim Viktoria Ba Ridas Kos. Long 2007, em bin lusim Henao Loyas na go wok long long kampani bilong bikpela brata na papa, Murray & Asosiet Loyas na kamap Prinsipel loya inap long dispela mun ol i makim em long kamap wanpela jas.

Tasol long wanpela yia stat long Septemba 2008 inap long 2009, em bin wok wantaim Komisin bilong Inkwairi we i save glasim ol lida na ol gavman dipat-



PROMIS: Loya Jacinta Murray i mekim tok promis pastaim em i sainim pepa long kamap jas insait long wanpela seremoni bipo long Gavana Jenerel Michael Ogio long Gavman Haus. Foto: Veronica Hatutasi

men sapos ol i mekim gut wok long sevim pipel na tu, sapos ol i yusim gut mani long kamapim ol wok na sevis i go long pablik bilong kantri.

Long 12-pela yia Jacinta i wok olsem loya, ol eria bilong em long wok em long sivil na komesel litigesen. Em save kamap makim planti ol keis long Nesanel na Suprim Kot.

Jacinta i namba tu meri jas long kantri, bihain long Jastis Cathy Dawani. Na dispela em i bikpela samting long sait bilong ol meri long PNG long lukim wanpela pikinini meri i kisim bikpela wok olsem.

Skrui stori wantaim Meri Wantok, wanpela samting we Jacinta i wari long en em long famili na moa yet, long lusim ol pikinini taim em i go mekim wok long Kundiawa long Simbu provins we bai em i kisim wok residen jas long hap. Dispela em bikos man bilong em i gat wok long Mosbi na ol pikinini i skul tu long Mosbi i stap.

"Nupela wok bilong mi long kamap jas long Kundiawa na stap wok long hap bai wanpela salens long mi na moa yet long sait bilong famili. Mi no bin givim bikpela tingting tumas pastaim bikos mi wok long lukluk tasol long wok-sait.

"Tasol olsem wanpela mama long ol pikinini, ol kandere na hauslain, mi save stap olgeta taim na lukautim ol. Tasol wantaim nupela wok we mi lusim ol long Mosbi na go long narapela provins, mi wari.

"Dispela em i nupela samting bikos long ol yia bipo i kam inap nau, i gat ol man jas tasol. Na planti taim, ol man i wok taim ol meri bilong ol i nogat. O sapos ol meri i wok, ol i lusim na bihainim ol man jas bilong ol i go long wanem hap bilong kantri ol i salim ol i go long en. Tru, Jas Cathy Davani em i namba wan meri jas long PNG, tasol em i wok long Mosbi na em i nogat wari bikos man bilong em na famili i stap long Mosbi. Tasol em i narakain wantaim mi we bai mi go stap na wok long Kundiawa. Mi bai lusim man na ol pikinini long Mosbi na dispela em i wanpela wari mi gat long en.

"Judiseri i no redi long dispela bikos em i nupela samting long gat ol meri jas long PNG, i moabeta ol i lukluk long dispela samting. Long mi yet, bai min wokim sakrifais na go tasol dispela em salens we mi mas daunim," Jacinta i tok.

Jacinta i bikos man bilong em i wanpela loyaman, em i save givim bikpela sapot long em na dispela nupela wok em i kisim, em i givim luksave long sapot na helpim bilong em.

"Man bilong mi i loyaman tu na em i save givim mi bikpela helpim long wok bilong mi. Mi givim em luksave na tok amamas long em dispela nupela wok mi kisim long en," Jacinta i tok.

Wok loya i bikpela samting na disisen ol i mekim i ken helpim o bagarapim laip, stap na sindaun bilong man. Meri Wantok i bin askim Jacinta long wok bilong em olsem loya, ol hevi em bungim na wanem edvais em ken givim long ol narapela, moa yet, ol meri loya.

"Yu mas redi gut, save long ol samting na bai yu wokim dispela taim yu rit planti ol samting i karamapim ol kot, ol disisen, ol apil na moa. Na yu mas oltaim putim gutpela redi gut bikos sapos kot jasmen i go long narapela wei, yu bai redi na wokim apil. Redim yu yet, wokim sabmisen ripot, rit na save long tok na mekim wanem samting em bikpela samting sapos yu wanpela litigesen loya i save go makim ol klain long kot," Jacinta i tok.

Wanem edvais em i givim long ol meri loya?

"Yu laik kamap loya, yu mas wok hat, i nogat narapela rot. Yu wok na bai yu gat ol narapela jas na loya we bai helpim yu.

"Husat meri loya i laik kamap jas, wanpela samting tasol mi tok gen long en em long redi gut, save na klia long ol samting taim yu go kamap long kot. Ol jas i putim ai long yu i stap.

"Sapos yu redim yu yet gut, yu nogat wari. Mi ken tok dispela em samting mi save wokim long ol yia mi wok olsem wanpela loya na go long nesanel kot long makim ol klain," Jacinta i tok.

Long wok bilong em, em i no bungim sampela hevi olsem sampela lain i no amamas o i kros long ol jasmen ol i kisim long en.

"Mi laikim wok na amamas na mi ken tok mi no bungim wanpela salens. Olsem mi tok pinis, sapos yu redim yu yet gut long ol keis na go long kot, yu bai no inap bungim wanpela hevi na wari," Jacinta i tok.

Jacinta i wanpela soka pilai meri tu ya ne em i tok em bai skruim yet pilai, tasol em i mas balensim taim bilong wok na pilai we i lukim olsem i no wanpela hevi.

Kantri mas sapatim SLIP

Sape Metta i raitim

SKUL LENING Improvmen Program (SLIP) lonsing long 5-pela distrik long Isten Hailans provins i bin kamap gut long las wik.

Ungai Bena, Henganofi, Kainantu, Obura-Wanenara kombain na Okapa em dispela 5-pela distrik i wokim SLIP projek lons.

As tingting bilong SLIP em long helpim ol sumatin na ol tisa long ranim ol skul wantaim gutpela pasin we trensperensi o nogat hait pasin tasol wokim samting long ples kliia na akauntabiliti o wokim ripot long rot bilong yusim mani i stap long stopim pasin bilong paulim mani. Peter Kants i go pas long kirapim dispela program i bin raun na lonsim program long ol skul.

Mista Kants i tok dispela program i kirap long wanem, luksave i bin kamap long planti ol elementeri, komyuniti, hai na sekonderi skul olsem sampela hetmasta na ol siaman bilong ol kul bot ov menesmen i save

...Gutpela edukesen program

tasol ol i wok long mekim planti paul pasin na yusim krangi mani bilong skul.

"Mipela i luksave olsem planti pikinini i sot yet long ol samting bilong yusim long skul na skruim save. Planti taim, ol sumatin long lowa gret i save yusim tit bilong ol long sapim ol pensil tsaim em i sot tru long rait wantaim long en. Na ol i save sot long ol sapena, rula, pen, raba, ol eksaisais bukna ol narapela samting moa bilong yusim long mekim skul wok bilong ol.

"We stap mani ol papamama i baim skul fi long en?" Mista Kants i askim.

Em i tok SLIP i kamapim dispela program long lukluk na stretim sindaun bilong ol sumatin na ol skul long ol wan wan eria bilong ol.

Em i tok bihainim SLIP Program we i bin stat long 2009 na i wok long tripela yia nau, ol i lukim planti gutpela kaikai. Na em i amamas long lukim ol senis na developmen i wok long

kamap long ol ruel skul na komyuniti insait long isten Hailans.

Avani Praimeri skul i stap long ruel eria bilong Kafetina i wanpela skul we i kisim SLIP Program i lukim olsem program i wok gut.

Aninit long SLIP program, Avani Praimeri skul i sanapim pinis wanpela nupela dabol klasrum kos bilong em i abrusim K40,000. Mani bilong bildim klasrum i bin kam long ol sumatin, papamama na wok bung bilong ol na ol hauslain bilong ol long kamapim dispela mani.

Het tisa bilong Avani Praimeri skul, Leanne e Poke, i tok olsem ol i amamas long lukim program i wok gut na karim kaikai, bihainim pasin bilong wok bung wantaim.

Misis Poke i tok SLIP Program i wanpela gutpela program na em i singaut long olgeta skul long provins na kantri long sapatim.



ISTEN HAILANS LONSIM SLIP: Asisten Sekreteri bilong SLIP, Peter Kants, (name), het tisa bilong Avani Praimeri skul, Leanne Poke na siaman bilong skul bot, Haki Hakeo, i katim riben long opim nupela klasrum long Avani Praimeri skul. *Poto: Sape Metta*

Asples kampani helpim redio edukesen program



GIVIM LONG HELPIM: Bisnisman na papa bilong Goroka Steseneri na Opis Ikwipmen Saplais, Pogio Ghate i givim K2,500 sekmani lon g menesa bilong redio Isten Hailans, Agnes Inabe, taim provinsel edukesen opisa, Robert Kakao i lukluk i stap.

Poto: Sape Metta

Sape Metta i raitim

OL SKUL pikinini long Isten Hailans provins bai lukim sampela gutpela developmen na senis i kamap long sait bilong edukesen bilong wanem, i gat gutpela luksave i kamap.

Dispela em bikos wanpela luksave i kamap we Goroka Steseneri na Opis Ikwipmen Saplais, wanpela asples kampani long Goroka, i go pas long givim helpim bilong em.

Bisnisman, Pogio Ghate, i papa bilong dispela kampani i tok ol pikinini i bikpela samting na olsem, yumi ma ss-

apotim ol long gutpela rot na ol i ken kisim gutpela edukesen long dispela rot.

Mist Ghate i mekim dispela toktok taim em i givim K2,500 i go long menesa bilong Nesanel Brotkasting Koporesen (NBC) Isten Hailans, Agnes Inape, long kamapim ol skul program long redio stesen we ol skul pikinini i ken harim, bihainim na kisim save long en.

Em i tok kampani bilong em i save sapatim planti ol edukesen wok long provins na dispela redio program em i wanpela long ol nupela program em i tingting long

sapatim long dispela yia na skruim i go long ol yia i kam tu.

Redio Isten Hailans Stesen Menesa, Misis Inabe, i tok redio stesen i stap bilong helpim olgeta lain long provins husat i ken yusim long harim brotkas na kisim infomesen sevis long en.

"Redio stesen bilong yumi i stap na mipela bai amamas tasol long kamapim wok brotkas long ol kain program bilong ol skul na ol narapela we pablik long provins i ken harim na kisim save long en," Misis Inape i tok.

Skul long Japan

GAVMAN BILONG JAPAN (MONBUKAGAKUSHO:MEXT)
SKOLASIP BILONG 2012 I OP NAU

Gavman bilong Japan i ofaim tripela kain skolasip olsem: Specialised Training, Undergraduate na Research Studies long ol pipel bilong Papua Niugini husat i laik skul long ol Spesolais Trening Koles o Yunivesiti long Japan.

Stori bilong wan wan kategori i olsem:

OL SPESOLAIS TRENING KOLES SUMATIN (tripela yia)

Ol Spesolais Trening Koles i save givim vokesen edukesen na Skolasip tem i gat 1 yia lainim tok ples Siapan. Ol apliken i mas pinisim Gret 12 (o bai pinisim gret 12 pastaim long mun Mas 2012) na mama i karim namel long Epril 2, 1990 na Epril 1, 1995.

OL ANDAGRADUET YUNIVESITI SUMATIN (faivpela yia)

Skolasip tem i gat 1 yia lainim tok ples Siapan. Ol apliken i mas pinisim Gret 12 (o bai pinisim gret 12 pastaim long mun Mas 2012) na mama i mas karim namel long Epril 2, 1990 na Epril 1, 1995.

OL RISETS SUMATIN (1 na hap yia o tupela yia)

Bilong ol Yunivesiti Graduet i laik mekim wanpela Riset Kos o wanpela Mastas Program (i mas skul inap long 16 yia) o wanpela doktoral kos (i mas i skul inap long 18 yia). Skolasip tem i gat 6 mun wok redi long lainim tok ples Siapan. Olgeta apliken em mama i mas karim ol long Epril 2, 1977 o bihain.

Ol aplikesen fom na infomesen pepa bai stap long Embasi long namel bilong mun Epril 2011 i go inap Jun 3, 2011.

Ol aplikesen fom we i gat bekim bilong olgeta askim na olgeta pepa long poromanim, na medikal setifiket i mas go long Embasi pastaim long Jun 17, 2011.

Long save moa, plis ringim skolasip seksen long Telepon: 3211800 na Fax: 3212278, o salim pas i go long:

Embassy of Japan, Scholarship Section
(Ground Floor, Cuthbertson House, Port Moresby)
PO Box 1040, PORT MORESBY, National Capital District

MARTIN Luther Seminari (MLS) i gat nupela prinsipel nau



NUPELA MLS PRINSIPEL: Dokta Wari Rupulga

Em long Dokta Michael Wari Rupulga i gat 45 krismas na em i bilong ples Mun long Mul Distrik, Westen Hailans provins. Em i marit na i gat 4-pela pikinini.

Lotu seremoni bilong tok tenkyu na kisim nupela wok i bin kamap long Mas 24 long MLS haus lotu yet.

Dokta Wari Rupulga em i wanpela pasto na leksera long MLS long eria bilong Nu Testamen na ol sios ministri.

Bihain long em i pinisim praimer na hai skul bilong em long Westen Hailans provins yet, em bin kisim diploma na baselas digri long Tioloji long MLS. Em i holim Mastas bilong Tioloji we em bin kisim long Pasifik Tiolojikel Kolis long Suva, Fiji na Doktas long Ministri long

Australien Luteran Kolis long Adelaide, Saut Australia.

Long sait bilong wok, em bin wok olsem pasto long Mendi taun Luteran Sios, leksera na din bilong ol stadis long MLS. Na prinsipel bilong MLS, eking din bilong ol sumatin na Din bilong ol stadis, edmisens na leksera.

Nupela MLS Pasto na Prinsipel, Michael Rupulga, i bin autim tok amamas bilong em long gavaning kaunsel we i bin ranim seminari insait long 10-pela yia i kam inap nau.

“Yupela i bin mekim gutpela wok wantaim ol presen na save God i givim yupela long en bilong ranim dispela seminari. Bikpela God i singautim mi long sevim MLS.

“Tenkyu tru long gat bilip long mi na makim mi long dispela wok. God yet bai givim mi stia long long ranim dispela seminari, bihainim laik bilong em,” Dokta Wari Rupulga i bin tok.

Ol Luteran Sios lida sindaun long disebol woksop

Paulus Tali i raitim

SAMPELA sios lida bilong Evanjelikel Luteran Sios (ELC/PNG) bilong ol distrik na seket long Morobe na lsten Hailans i kisim moa save na trening long sapatim na helpim ol disebol pipel long sios bilong ol.

Twenti (20) sios lida ya we tripela em ol distrik presiden bilong Immanuel, Hagen na Ukata i bin sindaun long tupela wik Disabiliti woksop i bin stat long Mas 7 na pinis long Mas 18. Woksop i bin kamap long Salvesen Ami konpresen senta long Lae .

Long lukluk bilong planti lain i bin kamap long dispela disabiliti trening woksop, ol i laikim bai sios (ELC/PNG) i strongim dispela kain program, tasol narapela samting tu ol i tok long en em, i nogat inap saveman long go hetim

program bilong ol disebol pipel long en.

Ol i lukim tu olsem hevi i stap long seket, peris na kongrikesen level we ol lida bilong ol i no bihainim stret rot long skulim ol kongrikesen memba bilong ol long rot bilong helpim ol turangu manmeriu sios memba bilong ol.

Trening i givim ol skul long ol sios lida na dispela bai helpim ol long mekim ol wok awenes insait long ol seket, peris na komyuniti bilong ol.

“Yumi ol sios lida i ken go aut na helpim ol lain pipel i gat ol bagarap long ol sampela hap bodi bilong ol long kamap gutpela memba bilong sios,” sekreteri bilong Evangelaisesen dipatmen, Reveren Binora Yunare i tok.

Em i tok amamas long Sosel Konsens opis bilong sios i go pas long dispela

program. Woksop i lukluk long disebol pipel long tripela eria. Dispela em long medikel, sariti na sosaiti.

Ol sios lida bilong Luteran Sios tude i bin kisim trening tu long lukluk long laip piksa bodi bilong man na givim helpim long ol sios memba bilong ol husat i disebol.

Long narapela sios nius, ol Luteran Sios mama long Lae siti i bin selebretim gut tru Wol Preia De wantaim ol program long Our Saviour Luteran Sios klostu long Bumbu Bareks long Lae.

Wanpela bikpela samting we ol mama i bin putim strongpela tingting long ol preia bilong ol em ol pipel kantri Chile long Saut Amerika we hevi bilong klaimet i senis i bagarapim ol stret. Na nau ples i drai na ol i bungim hevi long sot long

wara, kaikai na ol narapela moa.

Salens we ol meri i bin kisim long meri i go pas long Baibel Stadis, Nakei Siloi, em long tingim ol narapela na helpim ol long kamapim gut sindaun bilong ol.

Mis Siloi i bin tokim ol meri Luteran Sios memba long sanap strong long pasin bilong laikim na wanbel i go long narapela.

Em i bin tok tu olsem nau yet, ol meri i no tingim tumas rot bilong laikim narapela.

Em i tok tude, yumi save ting olsem yumi wan wan yet i moa gutpela, tasol i moa gutpela long pasin bilong serim na helpim i mas stap olgeta taim.

Ol meri i bin bungim ofa inap long K2,000 long sapatim ol program bilong wol preia de neks yia.

GLASIM TOK WANTAIM Fr Lollington Wiam



Rausim wod Pablik Sevan

GAVMAN i mas kamapim wanpela bil long rausim word o hap tok, pablik (servant) sevan, na putim wantok sevan.

Watpo mi kamapim dispela i olsem, sistem bilong Pablik Sevan i no moa wok insait long PNG. Igat bikpela paul wok na hevi istap tasol i nogat wok sek up. Yumi gat ol bikman olsem Pablik Sevis Komisin o wokas union o minista bos long dispela sekson tasol ol i slip tumas na i gat bikpela asua i wok long kamap long olgeta pablik o gavman dipatmen.

Orait, namba wan yumi glasim dispela wod Pablik Sevan I olsem wokman bilong gavman na sevim pipel.

Trupela as tingting i olsem em i bilong olgeta manmeri. Em wan blut o nogat, yumi mas redi long sevim olgeta. Namba tu yumi glasim Wod “Servant”, A person who is employed to do public duties or services. Em min olsem redi long helpim olgeta manmeri.

Namba tri em yumi glasim wod “Serve”, (perform duties) karimaut wok helpim long olgeta manmeri, lapun, pikinini na ol turangu taim ol i gat nid long kisim helpim. Tasol, sori tru dispela sistem i no moa wok long kantri bilong yumi. Ol pipel i bungim bikpela belhevi na pen i stap long dispela sistem bagarap wok bilong pablik sevan tasol, gavman i no bin putim nius i go insait na lukluk long ol dispela hevi bilong yumi.

Dispela pablik sevan sistem nau em i bilong wanblut na wantok tasol. Sapos wanpela wanblut o wantok i kamap long pablik opis “benk” hamas tausen o milion i pinis nating long em. Na sapos yu no wanblut, “sore tumas” yumi kisim hatpela taim na wok yumi laik mekim long em i popaia, na ples komyuniti i no senis liklik Olsem na i gutpela Gavman i mas senisim word Public Servant na putim Wantok Servant o Nepotism Servant. Em i moa gutpela long sistem bilong gavman bilong PNG na muvim ol dispela pablik dipatmen opis i go long haus lain long ol wanblut na pret long haus lain stret.

Sapos yumi glasim wokman bilong sios em i no wokman bilong famili na wanblut tasol, nogat em bilong olgeta manmeri olsem lotu Katolik, Angliken o SDA, em ol i redi na sambai long helpim olgeta manmeri na i no bilong wanlain tasol. Olsem Jisas, em i pikinini bilong God na em bikman tru. Tasol em lusim dispela sia na e mi kamap olsem servant na helpim olgeta manmeri long dispela wol. Em i givim laip bilong em yet na sevim yumi long inapim dispela tok, gavman i mas muvim wanpela bil long haus tambaran na rausim dispela wod Pablik Sevan na putim Wantok o Nepotism Sevan.

HAIWARA GO INSAIT LONG SIOS: Wanpela sios long Bisikani Soparibeu Lokol Level gavman eria long notwes Manus we haiwara i bin go insait bihainim bikpela sunami na guria long Siapan tupela wik i go pinis i bin kamapim.



Pipel long Vanimo kisim Wantok Redio Lait

OL PIPEL bilong Vanimo long Sandaun provins i ken harim ol gutpela stia toktok na ol singsing bilong liptim spirit bilong man na givim biknem bilong Bikpela na tok tenkyu i go long Gavana bilong provins, Simon Solo, bilong givim manimak long K100,000 long kisim Wantok Redio Lait i go long hap.

Wantok Redio Lait em i wanpela Kristen redio stesen i oporet long kantri na i save gat ol gutpela program long helpim ol pipel i painim salvesen na i kisim gutpela stia long kamap ol gutpela manmeri insait long famili, komyuniti na kantri.

Stesen long Vanimo i bin stat long mekim ol wok brotkas long las wik Sarere. Enjiniaring tim bilong Wantom Redio Lait i bin go long hap na mekim ol wok bilong putim nupela ripita stesen long hap.

Ol pipel long Vanimo na ol ples klostu i ken harim Wantok Redio Lait long 105.9 FM.

Emmanuel Nassam i bin makim Sandaun provinsel gavman taim em i tok tenkyu long Gavana Solo bilong givim K100,000 long stesen i go long Vanimo, i bin tok planti lain bai kisim gutpela kaikai bilong sol long ol gutpela program we redio Wantok Lait bai brotkastim long hap.



TOK PISIN NEWS
from Radio Australia
radioaustralia.net.au

Harim TOK PISIN long
Radio Australia
101.9FM
Port Moresby

Tok Pisin Service
6am - 7am 6080; 7240(KHZ)
7pm - 9pm 5995; 6020; 9710; 1280(KHZ)

Rugby Wol Kap bai mekim Fiji i holim demokratik ileksen

FOREN Minista bilong Nu Silan, Murray McCully i bin tok em i hop pilai bilong Ragbi Wol Kap bai strongim Fiji long tanim tingting na holim demokratik ileksen long 2014.

Em i tok sapos lida bilong Fiji, Frank Bainimarama i ken go long ol dispela mun i kam, i makim taim stret bilong ileksen, na long bekim dispela, Nu Silan bai rausim ol tambu em i putim long Fiji long raun bilong en na bai stat long mun Septemba. Long 2009, Fiji i bin bungim saspensen long Pasifik Ailans Forum, bihain long Komodo Bainimarama i no bin laik long holim ileksen long pinis bilong 2009.

Bihain i bin kamapim toktok olsem bai ol i no nap holim ileksen inap long 2014 bilong givim taim long kamapim ol senis long elektoral rol.

Mista McCully i no bin laik tok stret long em i go isi long Fiji.

Foapela ten gavman na ol grup painim we bilong stretim Libya

MOA long foapela ten ol gavman na intanesenel ogenaisesen bai bung long kamap wantaim sampela tingting long stretim Libya.

Dispela bung bilong ol em lida Muamma Gaddafi bai i no stap.

Dispela konpres long London bai tok-tok long ol wok bilong bringim halivim i go long ol pipel long ol eria em ol pait i kamap long en, na tu askim long kamapim sampela gutpela rot bilong wok politik em bai mekim ol pipel bilong Libya i makim wanem kantri ol i laikim long bihain taim. Taim ol memba bilong Libya Opposition bai go stap long dispela miting, bai i nogat wanpela mausman oa meri bilong Libya gavman bai kamap.

Long toktok bilong en long Tripoli, Deputi Foren Minista bilong Libya, Khaled Kaim i gat dispela toktok bilong ol dispela pipel em ol bai go stap long dispela miting long London.

Polis fos long Vanautu i nidim bikipela senis

WANPELA komisin ol i kirapim long mekim wok painim i go long pasin Vanautu Polis i bin mekim long wanpela trabel oa riot long 2007, i bin askim long bikipela ol senis i mas kamap long stretim gut Vanautu Polis Fos.

Tripela pipel i bin dai na planti ol haus paia i bin kukim taim lain pipel bilong Tanna na Ambrym i bin pait namel long ol yet long biktaun Port Villa.

Long dispela taim, Polis Fos bilong Vanautu na Para-militari Mobail Fos, i bin

bungim planti koros long i no hariap long mekim ol samting long stopim dispela ol trabel, em i bin kamapim tupela wik stet ov imejensi long Vanuatu.

Ripot bilong Komisn, em dispela wik Mande tasol i bin kam aut, klostu foapela yar bihain long dispela ol trabel i bin kamap.

Dispela ripot i go hed na i bin krosim polis fos long ol i saptim wantok bilong ol, i nogat gutpela menesmen na tu pasin korapsen i stap insait long Vanuatu polis. Tasol nupela Minista bilong Jastis na Komyuniti Sevis long Vanuatu, Ralph Regenvanu, i bin tok i gat nau sampela gutpela samting i wok long kamap insait long Vanuatu polis.

Singapore i tambu long bringim prut na kumu i kam long Japan

SINGAPORE i bin tambu long em i ken kisim ol prut na kumu samting i kam long sampela ol eria long Japan we guria i bin kamapim ol birua long en.

Ol i tok, ol i kamap wantaim dispela tingting bihain long ol i painim ol poisin o radioeksen insait long tupela nupela kain kaikai i kam long hap bilong Japan we guria na sunami i bin kamapim ol bagarap long en.

Agri-Food na Veterinary Authority bilong Singapo em lain i save kontrolim ol kaikai bilong kantri, i tok ol i bin painim ol posin insait long tupela kain kumu i kam long Japan.

Dispela toksave i min olsem ol i tambuim nau ol prut na kumu i kam long ol hap bilong Kanto rijen, em wanpela bikipela eria i bungim wantaim tu Tokyo.

Planti hap bilong wol nau i wok long pret long ol kaikai bihain long Fukushima Nuklia Plen i bin bagarap bihainim guria na sunami long namba 11 de bilong mun Mas.

Ol kantri olsem Saina, Rasia, Australia, Singapo, Amerika, Saut Korea na Taiwan i putim mak long wanem ol kain kaikai ol i bringim i kam long ol eria bilong Japan we em i bin bungim birua long guria na sunami.

Samting olsem 27 tausen pipel i bin dai long guria na sunami birua i bin kamap.

Saut Korea i salim 27 Not Korea pipel i go bek

South Korea i bin salim 27 pipel bilong Not Korea i go bek long kantri bilong ol bihain long ol i bin krosim solwara i go insait long Saut Korea long mun i go pinis.

Dispela 27 i bin aut long 31 olgeta i bin krosim solwara, em dispela tupela kantri i bin save kros long en longpela taim.

Ol i bin salim ol dispela Not Korea i go bek long kantri bilong ol long bot bilong ol yet – bihain long ol taim nogut – na birua



AMAMASIM GEM: Ol yangpela bilong ples Tiwi long noten Australia i amamas long soim laik bilong ol long pilai spot Australian Rules.

long ol bot i bin mekim ol long sukurim taim bilong wokabaut bilong ol.

Wanpela patrol bot bilong Not Korea i bin gaidim wokabaut bilong ol i go inap ol i krosim solwara mak bilong tupela kantri long wes kos bilong Peninsula.

Ol narapela foapela husat i bin skelim tingting long stap olgeta long Not Korea, i wok long stretim ol wok nau bilong lusim Not Korea olgeta na i stap long Saut.

Wanpela pising bot i karim 11-pela ol man na 20 ol meri bilong Not Korea i bin krosim Yellow Sea long boda bilong tupela kantri long taim traipela fog i bin wok long karamapim ples long namba 5 de bilong mun Februari.

Pastaim, Not Korea i no bin laik kisim ol dispela 27 pipel, na i tok ol i laik go bek olgeta 31 mas i go bek, sapos nogat, em i no tok orait long hap tasol, na long namel bilong mun nau ol i tok orait long kisim ol 27 i go bek.

Japan i tok, maski em i bungim long guria na sunami, tasol em i givim yet

MASKI Japan i bin bungim ol bikipela birua tripela taim insait long wanpela wik, Japan i bin tokim Filipins olsem, em bai givim yet halivim mani na saptim ol tingting bilong kamapim belisi antap long Mindanao ailan long Saut bilong Filipins.

Japan i bin givim wan milian dola halivim mani i go long Filipins bilong dispela projek antap long Mindanao ailan.

Ol i bin tilim dispela mani bilong wokim kamap siksapa ol skul, tupela ol trening senta na wanpela stesin bilong putim ol masin bilong halivim ol fama.

Embasi bilong Siapan long Manila i tokaut long Filipins gavman olsem, maski Japan i bin bungim ol taim nogut long bikipela guria na sunami, Japan bai go het long bihainim tok promis bilong en, olsem wanpela memba bilong Intanesenel Monitoring Tim.

Lain bilong Intanesenel Monitoring Tim i save was na sekim wanpela sisfaia o ol tok orait bilong pasim pastaim ol pait namel long Filipins sekyuriti fos na ol lain rebol, Moro Islamik Liberesen Fran.

Ol kantri olsem Malesia, Brunai, Libya, Norway na Yuropien Yunion em ol memba bilong Intanesenel Monitoring Tim.

Amerika i sutim bom long ol soldia bilong Kenol Gadafi

DIFENS Sekreteri bilong Amerika, Robert Gates, i sutim tok long ol soldia bilong Libya long lainim ap bodi bilong ol pipel i dai pinis klostu long ol eria ol woa balus bilong Amerika na ol poro kantri bilong en i wok long go het long kamapim pait long en, bilong sutim tok long ol kantri bilong Wes i kamapim dai bilong ol dispela pipel.

Planti ol intelijens ripot i ting olsem ol soldia bilong Kenol Gadafi i wok long bungim ol bodi bilong ol pipel ol yet i kilim long en, na i wok long lainim klostu long ol eria, ol alait fos i wok long dropim ol bom long en.

Toktok long CBS Televisen network bilong Amerika, Mista Gates i tok, Amerika i wok long painim hat long painim ol trupela stori o pruf olsem em na ol lain poro kantri bilong en i bin kamapim dai bilong ol dispela pipel.

Nau yet, Frans i tok, ol woa balus bilong en i bin bagarapim 5-pela ol woa balus na tupela helikopta bilong Libya gavman klostu long Misrata.

Wanpela mausman bilong Frans i tok ol i bin bagarapim ol dispela balus long wanpela eabes long taim ol i bin wok long rere long kamapim ol pait.

Ol lain soldia bilong Kenol Gadafi i bin wok long kamapim ol pait long birua bilong ol insait long Misrata long sampela wik nau.

Pacific BEAT

4. 5. 6am & 4pm. 5pm
including sport

Listen to Radio Australia
101.9FM Port Moresby

Radio Australia current affairs programme which focuses on island nations, bringing you morning and evening coverage of Pacific current affairs including interviews with political leaders, newsmakers, and the people who make the Pacific beat.



Win bai karim bel pen go

Wanpela man Samarai i tokaut long NBC tok bek program long las wik Fraide olsem dispela disisen bilong Lidasip Traibunel long givim tupela wik mekimsave long Praim Minista Sir Michael Somare em olsem Viles Kot disisen long pik bagarapim gaden long ples.

Kainkain manmeri gat skelim bilong ol yet long dispela disisen bilong Lidasip Traibunel kot we ol ting dispela mekimsave em i no inap long 13-pela sas bilong Praim Minista. Na Praim Minista em het bilong kantri na opis bilong em i bikipela tru winim ol arapela opis olsem na mekimsave i mas bikipela na ino tupela wik olsem.

Tasol bai yumi tok wanem, em disisen bilong Kot na i bihainim Kot sistem bilong yumi hia long Papua Niugini. Em ol ovasis Jas i harim dispela Kot na mekim disisen ya. Ol i no liklik lain o nupela lain bilong harim Kot. Husat



gen bai stopim dispela.

Samting kamap pinis na go pinis. Tasol bikipela samting em, dispela disisen ya bai stap long rekot na bihain bihain husat lida i kamap long wankain Kot olsem bai loya bilong ol i givim piksa long dispela na askim Kot long givim liklik mekimsave olsem long husat lida long bihain taim. Oposisen lida Belden Namah i tok dispela disisen em olsem laisens long stil.

Tasol loya bilong Somare bin tokaut tu long Kot long noken pinisim Somare long wok bilong em olsem memba bilong Palamen na Praim Minista bilong Papua Niugini bikos dispela inap kamapim planti bikipela hevi long kantri.

Ol hevi em tokaut em olsem, Gavman nogat taim

long holim bai ileksen bilong Is Sepik rijenol sit bikos kantri gat 18 mun tasol i stap long nesenel ileksen na tu ol bikipela wok bilong LNG bai i no inap ron gut taim i nogat Praim Minista i stap long mekim ol bikipela disisen bilong givim tok orait na lukim ol wok i ron gut. Ating planti arapela samting olsem ol wok developmen na servis bilong kantri bai bungim hevi tu long dispela.

Em orait, samting i kamap pinis na go pinis na insait long dispela tupela wik em bai yumi toktok go na win bai karim i go na yumi bai toktok long ol nupela samting we i kam yet long sait bilong gutpela sindaun na amamas bilong kantri na yumi olgeta.

Planti bikipela bel hevi, kros na tingting nogut save kamap na yumi save pairap planti tasol win save karim ol go na yumi save lusim na go het long ol wok bilong yumi. Tok Inglis ol tok; goes by with time.

Wan wik o tupela wik bai kam na go na yumi bai lusim na stap pren yet.

Dispela disisen bilong Lidasip Traibunel em rekot bilong Papua Niugini we ol loya bilong yumi bai amamas long yusim long ol arapela Lidasip Traibunel kot bilong ol long bihain taim.

Ombudsmen Komisin na Pablik Prosekyuta opis i westim bikipela mani na taim long ronim dispela Kot i kam kam inap long las wik Fonde na disisen i kamap na pinis. Amas mani na strong ol i lusim long painim evidens na mekim wok redi long amas krismas olgeta i kam em kaikai bilong em kamap long dispela disisen.

Yumi ol pipel mas save olsem, insait long olgeta gem yumi pilai, wanpela tim mas win na narapela tim mas lus. Tupela tim wantaim i no save win. Insait long Kot tu em kain olsem. Yu no inap dro wantaim man yu Kotim. Em bai win o yu bai win.

WANTOK KOMENTRI

Sapos yumi nap apim pe long laik...

SAPOS yumi ol man nating i bin gat rot bilong apim potnait pe bilong yumi long laik, ating em bai yumi olgeta i orait? Tru o nogat?

Bekim bilong dispela askim, bai no inap long amamasim yumi, husat i no holim wok memba bilong palamen.

Ating ol memba tasol, i ken apim mak bilong potnait pe bilong ol, bihainim laik bilong ol yet.

Na ol i save olsem nogat wanpela man o meri long pablik i ken pasim ol long mekim dispela.

Planti long ol memba bilong yumi, pastaim long ol i kam insait long wok politiks, em ol man nating tasol.

I tru, sampela long ol i gat nem long wok bisnis pinis. Tasol tingting bilong ol, na luksave bilong ol long dispela wok lida, i krangi olgeta.

Long kain ples olsem biksiti bilong yumi, Pot Mosbi, planti long ol memba bilong yumi long Palamen, i save lusim tingting long ol lain manmeri i votim ol i kamap memba, na tingting long mani ol i ken kisim, na holim, bilong skruim dispela biknem na luksave ol i gat olsem lida.

Olsem na taim ol i pilim olsem wok ol i mekim, i hat moa long ol arapela manmeri i mekim, na hevi ol i karim, i winim hevi ol arapela wokmanmeri bilong kantri i karim olgeta de, em nau, bai ol i go het tasol na apim potnait pe mak bilong ol.

Watpo i olsem?

Ol dokta bilong yumi, wantaim ol nes, ol sios helt woka, na etpos odali o helt opisa, i save mekim bikipela wok tru.

Planti long ol i no save malolo long taim bilong pablik holide, bikos wok bilong ol em i bikipela wok long yumi ol manmeri nating.

Sapos ol i nogat gutpela haus slip, nogat gutpela pe, o luksave long stretim gut sindaun bilong ol long wok, na inap pe long potnait long sindaunim gut famili long haus, bai ol i no inap wok gut.

Nau, gavman i wok long givim ol tok promis long stretim ol hevi bilong ol, tasol kros bilong ol i stap yet.

Ol dokta na nes i save olsem ol i holim sindaun bilong kantri long han bilong ol. I no ol lida. Nogat tru. Sapos olgeta dokta, nes, na helt woka i lusim wok, bai kantri i bagarap.

Olsem na mipela i tok makim ol lain manmeri long ples, ol lain manmeri long setolmen, na ol lain wok manmeri bilong kantri long tokaut olsem, yu lida man yu holim opis bilong gavman, tingting bilong yu i mas stret. Yu no kisim tok orait long pipel bilong apim pe na luksave bilong yu yet. Nogat. Yu kisim tok orait bilong pipel long kamapim gutpela wok na sindaun long ples. Tingting gut. 2012 i kam klostu.

WANTOK

Published Weekly, Thursday, for Word Publishing Company, Ltd. P.O. Box 1982, Boroko, NCD Papua New Guinea

Telephone: (675) 325 2500

Fax: (675) 325 2579

Email: editorial@wantok.com.pg

Pe bilong wanpela yia 52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager Elizabeth Konga

Editor Neville Choi

Published at Section 58, Allotment 3 Office 2, Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

DWU i helpim ekonomi bilong Madang

PLANTI ol lida long Madang provins i save mekim gutpela toktok olsem Divain Wod Yuni- vesiti (DWU) i givim bikpela helpim long ekonomi bilong Madang provins long sait bilong baim ol guds na sevises, givim wok na tu helpim ol liklik bisnis insait long operesin bilong en.

Ol lida olsem Rijinol Memba bilong Madang (MP) na Minista bilong Jastis na Atoni Jeneral, Sir Arnold Amet wantaim Presiden bilong DWU, Pater Jan Czuba i mekim gutpela toktok long ol ekonomik helpim yunivesiti save givim long Madang.

Pater Czuba i tok olsem Yuni- vesiti save traim oltaim long kisim

o baim ol guds na sevises insait long Madang. Em i tok ol samting bilong wokim ol bilding na leba long ol bikpela infrastraksa divel- opmen long yunivesiti em planti long ol em yunivesiti i save kisim long Madang.

Ol gutpela wok samting DWU i save soim long Madang i save kamap ples-klia long taim bilong

ol bikpela selebresin insait long yunivesiti eria olsem greduesin ol- geta yia, Open De, Kalsa De, Misining De na ol arapela bikpela konferens tu long hap.

Sampela ol lain husat i save kisim bikpela helpim long dispela taim kibung o selebresin i kamap long DWU em ol lain olsem ol gest-haus, na ol lain husat i ronim ol pablik trenspot bisnis olsem ol papa bilong PMV, ol haia kar sevis, PNG kostal siping kampani na tu ol balus kampani.

29th greduesin bilong DWU long Sande, Mas 6, 2011 em wanpela long ol dispela taim. Ol hotel na gest-haus long Madang i pulap tru long ol papamama na ol lain femili bilong ol lain sumatin husat i greduet na tu ol VIP (bikpela manmeri). Spes long ol Air Niugini balus tu i pulap bikos planti lain tru i bukim sit long go lukim greduesin.



Hai Komisina bilong Australia, Ian Kemish (rait-han) wantaim sumatin kaunsil presiden Kathleen Tok- ilivila, pastaim Madang gavana Sir Arnold Amet na DWU presiden, Pater Jan Czuba long taim bilong Misining Seremoni las Oktoba.



Dispela tupela piksa i soim Madang Lodge, lephan na fran bilong Smugglers Inn, ples ol gest i ken go mal- olo taim ol i raun i golong Madang na lukim DWU. Ol foto James Kila.



... We Manage All Your Travel Needs

Flight bookings for Domestic & International travel

Car Hire/Tours/Cruise/Hotel bookings

Issue Travel Insurance policies

Assist with travel documents



Global Travel Centre

P.O. Box 250, Diwai Post, Madang, Papua New Guinea

Tel: (675) 422 0011 Fax: (675) 422 3930

www.globaltravel.com.pg



SEFTI BILONG LAIN I YUSIM ROT

EM I NO WANPELA

GEM



NOKEN WOKABAUT LONG ROT.

LUKIM LONG KAR I KAM LONG YU.

Birua na bagarap save kamap long ol manmeri I wokabaut long rot na I no save lukluk long wanem kar I kam long ol. Yu mas wokabaut long rot we kar I ron I kam olsem long yu na mas lukluk olgeta taim. Em taim nau long tingting strong long ROT SEFT – em I no wanpela PILAI


ROT SEFTI em ino wanpela PILAI



A road safety initiative by Motor Vehicles Insurance Ltd



TRU TRU SPAIDAMAN: Alain Robert, o man planti manmeri long wol i save kolim em Spaidaman bilong Frans, i kalapim namba wan longpela bilding long wol, em Burj Khalifa long ples Dubai long Mande dispela wik.



TINGIM MAMA GRAUN: Namba 26 de bilong mun Mas em i Intanesenel Earth Hour, o taim we ol bikpela ogenaisesen long wol i makim bilong pasim olgeta lait. Eiffel Tawa long Frans i mekim olsem tu long soim olsem ol i tingim mama graun.



PAINIM BODI: Ol reskiu wokman long Japan i wok long sekim ples birua yet long painim ol odi bilong ol indai manmeri. Narapela bikpela birua nau em sindaun bilong nuklia pawa stesen riekta bai i ken pairap sapos ol i no lukautim gut.



OL REBEL RONAWE: Ol rebel paitman bilong kantri Libya i ronawe long ami bilong Gadaffi, na go bung klostu long ol taun Nofilia na Sirte bihain long ol ami bilong gavman i pait na ronim ol.

Raun wantaim Kanage olgeta wik



NEM: Ludwig Hesai
KRISMAS: 21 (man)
ADRES: Kilipau village, P.O. Box 96, Vanimo, Sandaun Provins
SAVE LAIKIM: Senisim Presen, pilai soka, harim musik na raitim pas.

NEM: Benjamin A. Wep
KRISMAS: 20 (man)
ADRES: Kilipau Village, P.O Box 96, Vanimo, Sandaun Provins
SAVE LAIKIM: Pilai soka, voli bol, senisim presen na painim wanpela meri long maritim.

NEM: Patrick Gisiye
KRISMAS: 20 (man)
ADRES: New Century Wholesale, P.O.Box 218, Kiunga Western Provins
SAVE LAIKIM: Pilai soka, mekim pren, raitim pas, go lotu na senisim presen.

NEM: Benuel Kapamai
KRISMAS: 18 (man)
ADRES: P.O. Box 2901, Lae
SAVE LAIKIM: Pilai soka, volibol, pilai gita, harim musik, ritim buk na go lotu

NEM: Bairy Wou
KRISMAS: 20 (man)
ADRES: Kilipau Village, PO Box 96, Vanimo Sandaun Provins
SAVE LAIKIM: Raitim pas, senisim presen, pilai soka, volibol na painim wanpela meri long maritim.

NEM: Benny Wagu
KRISMAS: 18 (man)
ADRES: Kilipau Village, P.O.Box 96 Vanimo Sandaun Provins
SAVE LAIKIM: Senisim presen, raitim pas, pilai soka, volibol na harim musik

NEM: Terence Mathew
KRISMAS: 16 (man)
ADRES: Ohu Primary School, PO Box 169, Madang511, Madang Provins
SAVE LAIKIM: Go skul, harim musik, go Lotu, raitim pas na mekim pren

NEM: Tenny Paul
KRISMAS: 19 (man)
ADRES: Komabea Primary school, PO Box 220, Kerema, Gulf Provins
SAVE LAIKIM: Pilai spot olsem volibol, soka na basketbol, harim musik, ritim niuspepa na wok

NEM: Jamie Awe
KRISMAS: 29 (man)
ADRES: C/Hargy Oil Palms, PO Box 21 Bialla, West New Britain Provins
SAVE LAIKIM: Lukim rugbi, mekim poroman wantaim ol arapela na painim wanpela lotu meri bilong maritim

NEM: Atasing Bafike
KRISMAS: 27 (man)
ADRES: Bumbum Primary School, PO Box 4588, Morobe Provins
SAVE LAIKIM: Harim musik, pilai soka, wat-sim TV na pilai kompyuta gem

Pasim meri pikinini

TAIM bilong ileksen na ol kainkain kendidet i go kempen long ples bilong Kanage. Kanage pinis long gaden na wokabaut i kam daun long rot na lukim planti kar i ron wantaim ol manmeri antap na singaut wantaim i go long ples. Taim Kanage i wokabaut i kam, wanpela kendidet i singaut long Kanage, hei paps, inap yu pasim meri pikinini bilong yu na givim long mi. Em i min long pasim vot na givim long em. Tasol lapun Kanage i bel kaskas na tokim kendidet ya 'Yu yet pasim bilong yu na givim i kam na bai vot i go long yu'

Mambu Wantok Bilong Yu Yet

Inglis em yu ya

SIPI em wanpela lapun man na em i no skul long bipo. Tasol oltaim em laik tok inglis. Olsem na taim em i raun na harim ol manmeri i tok inglis, em save lokim tasol long het na stap. Wanpela taim em sindaun wantaim Kanage na pikinini bilong em i bik het. Kanage tokim pikinini long stap isi tasol pikinini tanim na bikmaus long Kanage. Sipi bel hat olgeta na singaut long tok inglis, "Hey Son!



Don't you off the maus to your father. I you father grow you big!" Kanage i laik paitim pikinini bilong em tasol isi em lusim em i go na lap stret long toktok bilong Sipi.

J Baiwara Mosbi

Kidim feelings

PAPAS Kanage em bilong Suon ples long Erap, Morobe Provins. Wanpela taim ol lain bilong em long Kimbe salim tok long em long kam raun lukim ol. Kanage i go kisim ol lip brus bilong em long gaden na pasim ol redi long go long Kimbe. Lapun Kanage kalap long sip na i go long Kimbe. Wanpela de, lapun Kanage kisim ol lip brus bilong em na i go long maket long salim. Long maket, lapun Kanage lukim wanpela yangpela meri. Lapun Kanage trai lek na wok long wokim ai long meri i stap. Meri ya i no bisi long Kanage na em wok-about i go. Kanage wokabaut hariap

Yabi Nain Erap

Ol skwat!

Salim ol gutpela Kanage

tok pilai i kam long:

Kanage Tok Pilai

P.O. Box 1982,

Boroko, NCD

Port Moresby.

Email: atolire@wantok.com.pg

Boipren i bikhhet long mi

Dia Laipain

MI WANPELA sumatin meri i gat 19 krismas na wokim Gret 12 long Sekonderi skul. Mi gat boipren pinis we mitupela i bin bung taim mipela i wokim Gret 3. Bikos long skul, mi nau stap long narapela provins.

Taim mi skul i stap long narapela provins, kasen susa bilong mi i tokim mi olsem em i raun wantaim boipren bilong mi. Mi wari na sori nogut tru taim mi harim dispela nius. Taim mi go long Krismas malolo, mi askim boipren na em i tok dispela nius em i tru. Taim em i toktok, em i lukluk stret long ai bilong mi na em i tok mi olsem mi namba wan lewa bilong em stret na oltaim bai mi stap olsem gel bilong em.

Long mi tu, em i namba wan boipren mi gat na em tu i bin katim lewa bilong mi. Na mitupela i bin promis olsem bai mitupela i marit taim mipela i pinisim skul. Kasen bilong mi i tokim mi long lusim boipren ya, tasol mi painim hat long lusim tingting long em, maski em bin tok em bin raun wantaim kasen susa bilong mi.

Plis helpim mi.

Undecided Lover

Dia Pren

Tenkyu long serim wari bilong yu wantaim mipela. Mipela i sori long ritim stori bilong yu na mipela i luksave long no amamas bilong yu wantaim longpela taim boipren bilong yu.

Pren, mipela i save kisim ol wankain pas long planti meri wantaim dispela kain wari. Mipela i luksave olsem bikos yutupela i poroman long-



pela taim, em i no isi long luksave olsem em i wok long lukim narapela meri. Na i no narapela meri tasol kasen susa bilong yu.

Yu wok long painim hat long lusim em bikos olsem yu tok, em i namba wan boipren bilong yu. Na yutupela i bin tok promis long marit bihain long yutupela i pinisim skul. Yu pilim olsem wanem nau long dispela promis bihain long man i wokim bikhhet pasin long yu. Hau bai yu save olsem em bai em ino inap mekim obikhhet pasin gen? Lukim yu long ai na tokim yu olsem yu namba wan lewai mas noken mekim yu bilip olsem em i gat bikpela laik na long wankain taim, em i no stretim asua bilong em. Bai yu trastim em yet gen?

Yu tok tu olsem em i namba wan boipren yu laikim tumas na em i namba wan lewa bilong yu. Yu ting em i wokim trupela toktok taim em i tok em i gat laik long yu tasol lukim narapela husat i kasen bilong yu?

Pren, yu klia long wanem em trupela lav o laik pasin? Lav em maski wanem samting, yu mas pas wantaim na mekim gut long narapela husat yu pren wantaim. Lav i min olsem yu no tingim yu yet bikos yu tingim patna bilong yu moa yet long yu yet. Hia em tupela wod yu mas sekim na save long mining bilong ol. Em long "Lust" na "Infatuation".

Ol papamama bilong yu i olsem wanem, ol i tok orait long yu i gat boipren? Mipela i laikim yu mas tingting strong long skul bilong yu. Ating

i go long baksait bilong meri ya na holim han bilong em. Meri ya kirap nogut na tok inglis: 'Hey, what's wrong with you?' Papa Kanage bekim tasol olsem: 'I jus akism yu bilong kidim feelings!' meri ya kros na tok: 'Plis, I am not your partner'. Taim lapun Kanage harim dispela toktok, papa ya paul olgeta na tok: 'That's olrait. I just want to be your pren for nau tasol'. Bekim bilong Kanage wokim na ol man meri long maket holim bel tasol na kaikai pinga.

dispela i kamap long mekim yu tingting long prensip bilong yu wantaim manki ya. i moabeta yu lusim em na yu wok strong long stadi bilong yu. Sapos em i laikim yu tru, em i ken helpim yu wet inap yu pinisim skul, painim wok na bihain long dispela, plenim marit bilong yutupela.

Yu luksave olsem taim yu gat boipren yu givim yu yet moa wok antap long ol stadi bilong yu? Ol taim we yu inap long yusim long mekim stadi bilong yu gut em yu yusim long tingim na mekim ol samting i sut long boipren bilong yu. Tru tru, yu nogat wanpela samting i pasim yu wantaim dispela manki, tasol bikos yupela i bin mekim promis, yu wok long yusim taim na spes bilong yu long tingim em.

Mipela i strongim yu long serim ol wari yu gat wantaim ol narapela gutpela pren o papamama na ol i ken helpim yu. Sapos yu memba bilong wanpela sios o lotu, i moabeta yu go lukim Pasto long givim yu sampela gutpela siatok.

Mi Pren bilong yu Laipain

Sapos yu gat wari o hevi, rait i kam long dispela etres: Lifeline Counselling Services, P O Box 6047, BOROKO, National Capital District, PNG. Yu ken ringim opis long telepon namba 3260011 o 3261680. O sapos yu stap long NCD, kam na lukim mipela long opis bilong mipela long Waigani. Mipela i no inap putim trupela nem bilong yu long niuspepa, tasol mipela bai putim ol wari na hevi bilong yu.

Laipain



Program bilong Wanwan De

De - Mande - Fraide

6am - 10am - Sankamap show - Host: Kas. T
6:00am - Major Nius Bulletin
6:15am - Komuniiti Notis Bod
6:25am - Taim Bifo - wanpela singsing b'long bifo.

Tasol
9:30am - Final aua cruz
10am - 3pm - Morin Trek na Belo Pack
10:00am - Major Nius Bulletin - YUMIFM Nius Senta

2:00pm - Major Nius Bulletin - YUMIFM Nius
2:05pm - YU TOK - komiunuti awenes program
2:45pm - YUMI PANIM WOK Segment

6:10pm - 7:00pm Mon kamap sho
6:45pm - Komuniiti Notis Bod
7:00pm - 9:00pm - COCA COLA GARAMUT

Sarere belo cruz - Host: Tuluvan Vitz
1pm - 2pm - Sarere Belo Taim Dedikesen
2:00pm - NIUS - YUMIFM Nius Senta

RADIO AUSTRALIA TOK PISIN PROGRAM HARIM LONG: 101.9 FM

6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

TUNDE - Moning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

TRINDE - Moning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

FONDE - Moning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

FRAIDE - Moning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

SARERE - Nait
7PM Stesen op - Ol Nius Hetlain/Program Priviu
7.05PM Musik na Chit Chat

SANDE - Nait
7PM Stesen op - Ol Nius Hetlain/Program Priviu
7.05PM Musik na Chit Chat

Raun wantaim Wantok kru ... Gut bai Iliya

Nicky Bernard i raitim

KALA bilong skin bilong em i wait, tasol insait long lewa bilong em i bilak olsem yumi Papua Niugini stret. Dispela wait man em Iliya na em save wok olsem ripota bilong AAP insait long Papua Niugini.

Iliya kamap long Papua Niugini tripela yia go pinis, em save raun long olgeta hap long Papua Niugini, na save raitim nius bi-

long yumi Papua Niugini na salim i go long Australia na ol save kamapim olsem nius.

Planti bilong ol ripota long Papua Niugini bai save gut tru long em. Iliya olsem wanpela brata stret. Em bai mekim pani sapos olgeta ripota bung long wanpela hap kona long wanpela bikpela bung, na em bai no inap abrusim yu sapos em lukim yu.

Kontrak bilong Iliya i pinis long dispela yia, na em bai go bek long Australia na bai ol kampani bilong em bai salim em i go

long nupela kantri gen long wok long en.

Long wiken i go pinis, sampela ol ripota o ol nius lain i bin go long bung bilong em long Botenikol Gaden long tok gutbai long em na givim sampela samting long em long tingim Papua Niugini olsem wanpela ples bilong em.

Iliya yet i tok, sapos em raun long sampela hap na laik kisim malolo, em bai kam bek long Papua Niugini na malolo wantaim ol gutpela brata na susa bilong em.



Hia, Jada Wilson bilong Wantok Niuspepa i givim em wanpela present long karim i go bek long ples bilong em long Australia. Foto: Nicky Bernard

Table with columns: Week Before, Last Week, This Week, Charting Song, Artist. Includes songs like Queen of Karanas, Meri Morobe, Girl you, etc.

EMTV Television Guide

Table with columns: Time, Channel, Program Name. Includes programs like JOYCE MEYER Religious Program, AUSTRALIA NETWORK STATION OPEN, NATIONAL EMTV NEWS, etc.

TORO



BIABIA



KANAGE



TOKWIN

NGO toktok nating...
Moabeta ol NGO husat i tok baksait tumas long ol China lain bilong Ramu NiCo i mas givim sampela gutpela ansa long wanem ol i ken wokim. Maski toktok tumas na toktok i go wara nating. Ol dispela lain bilong China i mekim planti gutpela wok long Raikos na Usino-Bundi long Madang.

Sore long sikmanmeri na pikinini...
Ol dokta i toktok long straik na stop wok nabaut na turangu ating ol i no tingim ol sikmanmeri na pikinini o? Plis traim sore long ol sikman meri na wokim samting stret.

Ren em wansait tru...
Bikpela ren i pundaun long planti ples olsem Mosbi, Lae na Madang, tasol sampela ples long ol NGI rijon i drai tru na planti lain i kisim taim stret long

painim wara saplai.

Wanem taim bai ol i stretim rot bilong Madang...
Madang taun rot i bagarap tru, tasol nogat wok i kamap long stretim. Long niuspepa ol i tok olsem Praim Minista i givim K5 milien long stretim Madang taun rot. Tasol wanem taim bai wok long rot i stat. Ol manmeri na bisnis wet yet.

Tokwin Tasol...

B	U	K	A	I	T	P	O	T	M	O	S	B	E	C	T	K
G	H	U	I	R	E	X	S	A	D	U	Y	I	M	N	O	A
L	E	G	A	B	A	W	E	S	A	M	E	R	E	K	E	V
A	W	E	T	U	I	L	O	F	N	M	S	A	N	G	R	I
E	M	A	D	A	N	G	N	E	V	C	H	O	D	R	T	E
K	A	K	I	A	V	B	N	A	M	W	N	E	I	R	E	N
R	E	B	N	O	X	E	W	B	H	E	U	E	I	R	E	S
A	L	O	T	A	U	A	E	R	G	W	B	N	M	A	S	A
W	E	R	T	Y	I	K	O	A	H	A	D	C	O	K	I	D
A	S	T	R	D	B	O	H	Y	C	K	H	I	P	O	K	A
E	E	W	N	S	A	N	G	R	I	L	A	E	L	R	O	R
B	I	U	C	K	E	L	V	A	N	I	M	O	K	O	L	U
M	K	E	N	T	F	A	R	M	E	S	U	Y	N	G	J	I
I	U	P	N	E	T	I	O	N	M	B	C	Z	E	S	E	D
K	S	U	S	E	P	O	P	O	N	D	E	T	A	I	D	E
W	A	L	L	A	R	O	F	C	I	D	R	O	N	I	Y	J
M	A	L	U	A	B	A	R	A	U	A	G	N	E	R	O	L

Painim al nem bilong al dispela biktaun bilong yumi:

KAVIENG	LORENGAU	RABAU	KIMBE
BUKA	LAE	ALOTAU	DARU
POPONDETA	WEWAK	VANIMO	GOROKA
KEREMA	MENDI	WABAG	MADANG
KUNDIAWA	MAUNTEN HAGENPOT	MOSBI	

	9		7		5		2
2			9			3	
7	3	6	2		1		8
			6	3			4
5			9	4		7	1
4			7	1			
3	8			1	4	5	7
	2			5			3
6		5		3		2	

8	9	2	6	5	4	7	3	1
1	5	3	7	2	8	6	9	4
6	7	4	1	3	9	2	5	8
2	8	9	5	1	6	4	7	3
5	3	7	8	4	2	1	6	9
4	1	6	9	7	3	5	8	2
9	2	8	4	6	7	3	1	5
3	6	1	2	8	5	9	4	7
7	4	5	3	9	1	8	2	6

Ansa bilong las wik Sudoku

M	A	N	U	S	N	A	L	I	A	H	N	E	T	S	E	W				
	A		U													E	D			
I	D	A					L	A	R	T	N	E	S			C				
S	E	A					I	S	S	E	P	I	K			T	N			
N	B		N																	
U	O		G														S			
B	R																N			
R	B	O	G	E	N	V	I	L									A			
I	M																E	N	L	
T																				
E	N	G	A																A	A
N																				
W	E	S	N	U	B	R	I	T	E	N	A	A	E							
S	A	U	T	E	N	H	A	I	L	A	N	S	O	R	O	I				

Ansa bilong las wik Pasol

EMTV Television Guide

business and financial issues affecting PNG.
7.30PM G 60 MINUTES
8.30PM PG SUNDAY MOVIE:
JOURNEY TO THE CENTRE OF THE EARTH (PREMIERE) - (2008) Action/Adventure/Family - On a quest to find out what happened to his missing brother, a scientist, his nephew and their mountain guide discover a fantastic and dangerous lost world in the center of the earth. Stars: Brendan Fraser, Josh Hutcherson and Anita Briem.
10.30PM G RUGBY SEVENS FINALS SHIELD, BOWL, PLATE AND CUP
10.30PM G HILLSONG
11.00PM G NATIONAL EMTV NEWS REPLAY
11.30PM AUSTRALIA NETWORK
MANDE, APRIL 4 2011
5.00AM G JOYCE MEYER Religious Program
5.30AM G TODAY
9.20AM G DEPARTMENT OF EDUCATION CLASSROOM

BROADCAST
11.00AM AUSTRALIA NETWORK
2.59PM STATION OPEN
KIDS KONA
3.00PM G MAGICAL TALES
3.30PM G HI-5
4.00PM G THE PYRAMID
4.30PM G THE SHAK
5.00PM G KITCHEN WHIZ (NEW KIDS SERIES) - Kitchen Whiz is a fast and fabulous kids game show with a focus on the world of food, cooking and food science. Over four rounds, contestants aged 12-14 years old answer questions and compete in fun, messy tasks, earning points and taking home prizes.
5.29PM G EMTV NEWS UPDATE
5.30PM G MILLIONAIRE
HOT SEAT
6.00PM G NATIONAL EMTV NEWS
7.00PM G TOK PIKSA
7.27PM EMTV TOK SAVE
7.30PM G MONDAY NIGHT FOOTBALL: Storm vs. Bulldogs
9.30PM G VOU
8.00PM G MONDAY NIGHT FOOTBALL: Wests Tigers vs. Raiders
10.00PM G A CURRENT AFFAIR

11.00PM G NATIONAL EMTV NEWS REPLAY
11.30PM AUSTRALIA NETWORK
TUNDE, APRIL 5 2011
5.00AM G JOYCE MEYER Religious program
5.30AM G TODAY
9.00AM EMTV PRIME TIME LINEUP
9.20AM G DEPARTMENT OF EDUCATION CLASSROOM BROADCAST
KIDS KONA
3.00PM G MAGICAL TALES
3.30PM G HI-5
4.00PM G THE PYRAMID
4.30PM G THE SHAK
5.29PM G EMTV NEWS UPDATE
5.30PM G MILLIONAIRE
HOT SEAT
6.00PM G NATIONAL EMTV NEWS
6.30PM G A CURRENT AFFAIR
7.00PM G HAUS & HOME
7.57PM EMTV TOK SAVE
8.00PM PG MILLION DOLLAR DROP
The Million Dollar Drop is a game show

like no other. The contestants work together as a team to take on one of the most difficult challenges of their lives, to keep the million dollars cash stacked up in front of them.
Hosted by Eddie McGuire.
9.00PM G SUPER LEAGUE: Leeds v Wigan
10.30PM G EMTV NEWS REPLAY
11.30PM AUSTRALIA NETWORK
TRINDE, APRIL 6 2011
5.00AM G JOYCE MEYER Religious Program
5.30AM G TODAY
9.00AM EMTV PRIME TIME LINE UP
9.20AM G DEPARTMENT OF EDUCATION CLASSROOM BROADCAST
2.59PM STATION OPEN
KIDS KONA
4.57PM EMTV TOK SAVE
5.00PM G MILLIONAIRE HOT SEAT
5.55PM G CRIME STOPPERS
6.00PM G NATIONAL EMTV NEWS
7.00PM PG THE WORLD AROUND

US - Nara - The Omizutori Festival Documentary - Omizutori is a well-known festival which has been practiced for more than 1,200 years. Also, known as shunie, is the ceremony of water and fire that takes place at the Nigatsu-do hall of the Todaiji temple, Nara. It is held from March 1st to 14th every year.
7.57PM EMTV TOK SAVE
8.00PM PG THE FARMER WANTS A WIFE
9.00PM M WEDNESDAY NIGHT MOVIE: I AM LEGEND (2007) Drama/Sci-Fi/Thriller - Years after a plague kills most of humanity and transforms the rest into monsters, the sole survivor in New York City struggles valiantly to find a cure.
Starring Will Smith.
11.00PM G A CURRENT AFFAIR
11.00PM G NATIONAL EMTV NEWS

Ol Progam na Kilok i ken senis...

BSP no amamas long bagarap kamap long opis bilong ol long rurel senta

BSP Rurel i nupela Rurel Benking tingting em BSP i lonsim long 2010 long kamapim benking sevis long rurel komyuniti long Papua Niugini.

Dispela tingting i "komyuniti sevis" long wanem sevis i bilong givim sevis long ol manmeri long ples.

Em i no inap kamapim win mani bilong BSP tasol bilong manmeri i ken kisim helpim long em.

Nau yet BSP Rurel i opim 6-pela ejensi: Kwikila, Daulo, Banz, Kerowagi, Minj na Lufa.

Na BSP i save kisim ol lokal manmeri long dispela ol ples long mekim wok.

Long lonsim bilong wan wan ol ejensi, askim i save go long ol lidaman bilong dispela ol komyuniti na tok klia i go long wanem samting ol lidaman bilong dispela ol komyuniti i mas mekim long lukim kain sevis i stap.

Moa yet long kamapim na bihainim ol rot we bagarap o kain hevi olsem stil pasin i kamap long dispela ol opis.

Tasol BSP Sif Eksekutiv Opisa, Ian Clyne, i no amamas long stil pasin i kamap long BSP Rurel Ejensi opis long Daulo, Isten Hailans Provins na Kwikila, Sentral Provins long Tunde 22 Mas, 2011.

Em i tok stap bilong dispela sevis i ken kamap sapos ol lokal

komyuniti na lidaman i lukautim olsem samting bilong ol yet.

Sapos nogat hevi olsem stil pasin bai kamap na dispela ken mekim BSP i senisim tingting na pasim dispela sevis.

Em i tok long lonsing bilong dispela sevis long Kwikila, Sentral Provins, long 26 Novemba, 2010, Fainens na Tresari Minista, Peter O'Neill, i givim bikpela amamas long dispela program.

Em i tok BSP Rurel i sapotim Visen 2050 bilong Gavman long bringim sevis i go klostu long ol manmeri.

Na olgeta tingting i mas stap bilong sapotim kain program olsem.

Long dispela taim Mista O'Neill i tok: "dispela i gutpela wok poroman program" long developmen bilong kantri.

"Na olsem gavman bai sapotim BSP long kamapim dispela program we i gat bikpela mining long em.

"Em i gutpela na mi amamas long lonsim BSP Rurel Ejensi, na olsem mi laik tok tenk yu long BSP long kamapim.

"Dispela program bai lukim BSP i wok bung wantaim gavman olsem poroman bilong em long bringim sevis i go long ol rurel manmeri," O'Neill i tok.

Em i tok taim em i opim Kwikila olsem ejensi em i hop olsem dispela bai lukim em i opim planti ol



SEVIS KAM: Mista O'Neill i katim ribon long Kwikila, Sentral Provins long lonsing bilong go bilong BSP Rurel Benking Sevis program. Raunim na lukluk i stap em (l-r) ol opisa bilong Dipatmen bilong Fainens na Tresari; Memba bilong Rigo Ano Pala; Paru Aihi (Kairuku-Hiri MP) na Paul Thornton, Menesa bilong BSP Rurel Benking program.

Poto: BSP

arapela brens long kantri.

Na Mista O'Neill i strongim tingting bilong BSP opisa na komyuniti olsem gavman bilong Somare bai sapotim.

Hetman bilong BSP Rurel Paul Thorton i tokaut long dispela taim: "Mipela i mekim dispela wantaim spirit bilong Visen 2050 bilong Gavman long lukim olsem long 40 yia bihain taim manmeri bai isi long kisim helpim long mani na mekim wok bisnis bilong ol.

"Mipela i mekim dispela long spirit bilong Nesanel Gol na Dairektiv prinsipel bilong Mama Loa we i tok long olgeta manmeri i mas isi long kisim sevis.

Ol manmeri husat i gat BSP Rurel akaun bai gat BSP Rurel Kundu Kad we ol i ken yusim dispela long 200 ATM na 2,900 EFT-POS teminol long kantri.

Manmeri i ken yusim BSP Rurel Kundu Kad long:

- BAIM ol samting long stoa o

kisim kes (mani) taim ol i baim ol samting;

- KEN rausim o widroim mani;
- KEN mekim eataim top-ap; na

- Printim liklik ol toktok bilong benking bilong ol

Long dispela as Mista Clyne i tok dispela i bikpela sevis na bilong wanem sampela manmeri i laik bagarapim o pasim taim ol i stil.

APNG na JDA Wokman bung wantaim long mekim wok



GUTPELA: (l-r) Scott Roworth, Sif Komasel Opisa, APNG; Stephen Grey, GM, JD Wokman, na Kila Roberts, Travel Kodineta, JD i amamas long dispela tok orait. *Poto: APNG.*

AIRLINES PNG na JDA Wokman Limited i bung wantaim long inapim laik ol kastoma bilong tupela i gat long em.

Planti wok manmeri nau i kam insait long kantri bikos long gutpela kamap bilong maining, petroleum na ges sekta.

Airlines PNG i gat gutpela sevis bilong ron insait long Papua Niugini na long Brisben na Cairns long Australia.

Kampani i save givim ol koneksen ron i go long planti ol ples bilong Australia na Nu Silan na em bikos long wok bung bilong em wantaim Virgin Blue Grup, wanpela Australia balus kampani.

JDA Wokman i statim wok long PNG long 1991 na inap nau i givim kain sevis bisnis na humen risos sevis long ol kastoma bilong em.

"Bikpela namba bilong ol wok manmeri long kam insait long kantri i mekim tupela kampani i mas wok hat moa long bungim laik bilong ol.

"Strong bilong mipela i stap long menesim ol manmeri, rikutim na makim ol manmeri long go wok we Airlines PNG i givim.

"Taim mipela bung wantaim olsem, tupela kampani i kisim win mani long em," Stephen Grey, Jeneral Menesa, JDA Wokman i tok.

Kastoma bilong JDA Wokman nau inap long lukautim taim bilong ol wok manmeri bilong em i laik ron i go kam.

Dispela i kamap bikos helpim bilong Airlines PNG.

"JDA Wokman i bikpela PNG kampani na mipela i amamas long wok bung wantaim em.

"Na Airlines PNG i gat strongpela tingting long mekim isi long ol ron bilong ol manmeri.

"Wantaim dispela wokbung wantaim JDA Wokman mipela inap long lukautim ron bilong ol wok manmeri bilong em na givim moa taim long wok bilong ol.

"Airlines PNG olsem wanpela bikpela balus kampani long kantri, i lukluk long kirapim ol wok olsem PNG program.

"Mipela i kamapim toksave bilong gutpela netwok na resevesen senta long ol kastoma bilong mipela," Mista Roworth i tok.

Dispela nupela program i soim narapela piksa bilong tupela bikpela PNG kampani we i laik bung wantaim na givim sevis long ol manmeri bilong kantri.

HAC ken kamapim kaikai bilong LNG

HAILANS Agrikalsa Kolis we Dipatmen bilong Agrikalsa na Laipstok i lukautim i gat strong bilong kamapim kaikai long ol wok manmeri bilong Likuifaid Netsural Ges (LNG) projek.

Kolis we i stap klostu long Maunt Hagen siti em

Dipatmen i tok i redi long kamapim kaikai sapos askim i kam long LNG projek na ol maining kampani.

Dispela em ol tingting bilong fam menesa Gibson Simon husat i tok kolis i gat inap graun bilong wokim fam bilong kaikai.

Em i tok kolis nau i save kisim gutpela sapot long mani na wantaim ol samting bilong mekim fam dispela bai helpim em tru long kamapim moa kaikai.

Mista Simon i tok wantaim save em i gat long wok long fam long 10-pela krismas dispela i inap long helpim em long luksave long wanem samting em inap long kamapim.

"Mi bilip kolis inap long go insait long mekim wok bisnis long faming long bungim laik em LNG projek i gat long em.

"I gat inap graun na ol masin long mekim ol bikipela fam na dispela i no hat long kolis i mekim.

"Long dispela taim mipela i kamapim kaikai bilong ol sumtin tasol.

"Sapos ol LNG projek na ol maining kampani i laikim helpim bilong mipela, mipela bai redi tasol long helpim," Mista Simon i tok.

Kolis i gat inap ol samting bilong skulim ol sumatin long Hailans rijen long kamap ol fama.

Em i tok planti ol ples olsem ol skul, grup bilong

ol meri na ol yangpela i lukave long bikipela wok bilong kolis na i wok long salim ol sumatin bilong ol kam long kolis long kisim save.

Ol fama i wok long kam tu long kolis long kisim moa save.

Simon i tok namel long ol kaikai we kolis i wok long planim em taro, tapiok, rais, kumu na painepel.

Dispela ol kaikai i kisim bikipela hap taim bilong ol sumatin long lain na mekim wok. Moa yet kaikai bilong ol fam we ol sumatin i wok long em i kamapim kaikai bilong kolis we ol sumatin i kaikai gen.

Em i tok kolis na kantri inap long salim taro i go aut na mekim mani bikos i gat bikipela laik i stap long wol.

Inap long nau kolis i bin salim olsem tupela (2) tan na kisim K2300.

Wantaim taro em kaukau na kolis i bin yusim kaukau long kukim na givim kaikai long ol sumatin. Dispela i daun kos bilong kolis i baim kaikai long ausait.

Inap long dispela yia kolis i bin yusim olsem 1,400 skwe mita graun na kamapim olsem 5,000 kilogren bilong kaukau.

Long taim kolis i kamap em ui lukim olsem 2300 sumatin i go aut bihain long ol i kisim save na narapela 1500 sumatin long ol lain husat i kisim hap taim kos.



NAISPELA: Wampela wok meri bilong PNG LNG i agris long gutpela kumu i save kamap long Hailans. Kain kumu em HAC i ken givim LNG kampani.

Wok skruim bihainim plen bilong ol gavman

GAVMAN i amamas long wok skruim bilong ol progrem olsem Smolholda Sapot Sevises Ekspensen Projek (SSSEP) we ol go wantaim plen bilong ol gavman ejensi olsem Nesenel Agrikalsa Developmen Plen (NADP), Developmen Stratejik Plen (DSP) 2030 na Visen 2050. Deputi Seketari bilong Agrikalsa na Laipstok Dipatmen,

Francis Daink, i tokaut long dispela long kibung bilong SSSEP long Lae i no longtaim i go pinis.

Em i askim olgeta ejensi husat wok bilong ol i pas wantaim SSSEP long ol i mas wok strong bai tingting bilong gavman i ken karim kaikai.

Em i tok dispela i tingting bilong gavman na ol i mas bihainim.

Wampela tingting bilong Visen

2050 em long lukim ol manmeri i wok long mekim mani na strongim ol yet long ol sekta olsem agrikalsa.

Na DSP yet i lukim agrikalsa sekta olsem bikipela sekta bilong karim aut dispela tingting.

Wok bilong SSSEP nau i kamap long tupela nupela provins olsem Sentral na Simbu.

Long dispela ol opisa bilong

SSSEP bai mekim wok long surukim na karim aut wok developmen, humen kapasiti developmen na ol arapela samting.

Mista Daink i tok ol manmeri long woksop olsem tingting bilong ol i mas sut i go long karim kaikai bilong tingting bilong gavman.

Long sapotim Deputi Edministreta bilong Morobe Provinsel

Gavman, Geoving Bilong, i tok ol i traime SSSEP long Morobe na Isten Hailans na em i wok na em bilip dispela progrem nau i ken kamap gut long ol arapela provins.

Em i tok tenk yu long Nu Silan Aid aninit long gavman bilong Nu Silan long helpim wantim long K3 milion long karimaut dispela progrem.

PNG bung wantaim Pasifik kantri long toktok bilong kamapim kaikai

PAPUA Niugini i wampela bilong 14 Pasifik Ailan kantri husat i redi long kamapim Fud Sekyuriti na Sastenabel Laivilhud Progrem (FSSLP).

FSSLP i kamap aninit long Fud na Agrikalsa Oganaisesen (FAO) we as tingting bilong em long kamapim kaikai bilong strongim ol turangu planti em ol meri na ol yangpela.

Dispela progrem i bilong stap givim tingting long ol Pasifik Ailan

kantri olsem kamapim kaikai i bikipela samting na olsem ol i mas mekim long strongim laip bilong ol lain husat i no inap long sapotim ol yet.

Ol bikipela tingting long stap bilong fud sekuriti em long kaikai i mas stap, i isi long kisim, long rot bilong yusim na igat kaikai oltaim.

Ol gavman bai lukluk long kamapim kaikai, abus, lukautim pis, kumu na diwai bilong

strongim laip.

Dispela progrem bai lukim olsem wan wan ol haus i kisim ol sevis, kamapim toktok bilong wok didiman na gat sans bilong mekim maket.

Ol arapela samting em long ol atoriti i kamapim ol polisi na plen bilong stretim hevi bilong sot bilong kaikai.

Tupela FAO saveman husat i stap long Samoa, Aleki Sisifa na Dokta Siousiua Halavatau i bin

kam long PNG long toktok long FSSLP wantaim ol opisa long Dipatmen bilong Agrikalsa na Laipstok na ol arapela opis we wok bilong ol i pas long dispela progrem.

Long taim bilong toktok long woksop, Deputi Seketari bilong Dipatmen bilong Agrikalsa na Laipstok Francis Faink, long makim maus bilong Seketari i tok FSSLP i opis we i kisim tu wok bilong Rijinel Progrem Fud Sekyuriti

long karimaut 2004 i go long 2007 na inapim tingting bilong PNG long kamapim moa kaikai long strongim laip bilong ol manmeri.

Em i tok PNG i kamapim pinis ol polisi na plen pinis long lukluk bilong hevi bilong fud sekuriti tasol kamap bilong FSSLP i inapim dispela tingting.

FSSLP bai stap aninit long lukaut bilong ol ejensi bilong PNG olsem PNG Visen 2050 tu.



David Moihe bilong Vanimo i mekim nois antap long solwara long G4S sot bod resis bilong ol Open Man divisen long nesenel sefing taitol long Tupira las wik. POTO: Media Partners.

STRONG: Mark Mexico bilong Kamkumung Crushers i traिम long brukim banis bilong Sine-yongo long Coca Cola lpatas kap gem bilong ol long Lae las wik. Crushers i 29-14 na bai stap insait long fainol long mun i kam.



GIAMAN: Pangtel pilaia i traिम long giamanim birua bilong em wantaim bal long kopret tas gem bilong ol meri las wik Sande long Mosbi. POTO: Andrew Molen.



PAIT: Wanpela strongplea pait i kamap namel long ol NCD na Sentrol boksa long Mosbi las wik taim ol i mekim laspela seleksen bilong NCD tim husat bai go long Arafura gems long Mei dispela yia. POTO: Andrew Molen.

KIK: Wanpela Besta U20 pilaia i rausim bal long gol maus bilong ol bipo long ol Hekari kam klostu long em, insait long NSL semi fainol gem bilong ol las wik Sarere long Mosbi. Hekari win 5-1. POTO: Andrew Molen.

TOKSAVE: Salim ol spots dro bilong yu kam long Feks; 325 2579, e-mel; amolen@wantok.com.pg o kam lusim long Wantok Niuspepa opis long Central Waigani, NCD.

Susa gem bilong tenis

Save Long Gem wantaim Andrew Molen



PLANTI ol spot i em i wankain, i sage sampela stail, bilas, sais o loa bilong pilai tasol i save mekim ol i narapela kain liklik long ol narapela.

Long dispela as yumi ken tok olsem skwas (squash) em i wanpela susa gem bilong tenis. Em i olsem, tebol tenis na badminton we i klostu wankain. Dispela i kain olsem sofbol na besbol na ragbi lig na ragbi yunion. Wanwan i gat stail bilong ol na skwas tu i gat we bilong en long pilaim.

Histri bilong skwas

Skwas i kamap long narapela 5-pela gem we ol i save yusim reket (racquet), han glav na bal, we i save kamap long 12 senseri (century) long Frens.

Long pilai skwas, yu mas paitim bal i go long wol na em bai kalap i kam bek long yu, long dispela as ol i tok skwas i stat olsem wanpela pilai bilong ol mangi long bung na amamas tasol.

Ol i save pilai long rot na namel long ol haus we ol i save paitim bal i go long ol wol.

Skul bilong ol wokmanmeri bilong sios long Frens i save pilai wanpela kain gem olsem tu we ol i save putim wanpela bikpela han glav na paitim bal i go long bikpela pis net we ol i save taitim namel long ol haus bilong ol long outsait.

Dispela stail i mekim ol i kamapim ol reket bilong tenis na skwas.

Tenis i bin kamap long dispela tu long 15 senseri na i go long ol arapela kantri long Yurop (Europe).

Skwas i kamap strong gen long Inglen (England) ol i kolim "racquets" we i save kamap insait long sampela ol kalabus.

Em i olsem tenis tasol ol pilai i no save paitim bal i go antap long net, ol i save paitim wanpela liklik bal i go long wol.

Planti moa senis bipo skwas i kamap gut long Harrow School long Inglen.

Ol i mekim namba wan skwas kot long hap na ol i mekim bal wantaim gumi na ol sumatin i mekim reket i nap long han bilong ol long paitim bal.

Dispela ol reket i senis i kam inap long ol kain reket yu save lukim o yusim tete long dispela spot.

Stail na loa bilong pilai skwas

Pilai graun bilong skwas em i stap insait long haus we i gat 4-pela wol i go antap.

Astingting bilong pilai em long paitim bal i go long bikpela wol i stap pas long yu na taim bal i kalap i kam bek bai em i taim bilong narapela

pilala long paitim i go bek.

I save gat wanpela ret lain i stap antap long wol, dispela em i mak we yu mas paitim bal insait long en.

Sapos yu paitim bal i go outsait long dispela mak em bai narapela pilai i kisim poin.

Em bai kisim poin tu sapos yu no paitim bal hariap na em i paitim graun tupela taim.

Tupela pilai i save resis long skwas tasol em i wanpela gem we yu mas lukluk gut tu bilong wanem bal i ken paolim yu taim em i pas long wol na kalap i kam bek.

Ol pilai i mas werim gutpela su we i noken wel na tu gutpela siot na trausis we i noken holim pasim em long ron i go kam na paitim bal.

Wanwan pilai mas i gat wanpela reket long paitim bal wantaim.

Skwas reket em i bikpela na longpela liklik moa long tenis reket.

Skwas long PNG

Skwas em i no bikpela spot tumas long Papua Niugini tasol em i kamap strong long 1990's na planti yangpela manmeri nau i save pilai.

Planti save yusim olsem gem bilong ekse-sais o long pilai na amamas tasol taim ol i nogat wok.

Sampela biknem skwas pilai bilong PNG em Barbara Stubbings, Naluge Guy, Derek Hunter na Eli Webb.

Developmen bilong skwas


Em i no isi long ronim skwas insait long PNG tu bilong wanem em i spot we i mas i gat gutpela pilai graun na tu ol samting bilong pilai olsem ol reket, su na klos em i bikpela mani.

I nogat planti manmeri long ol provins na ruel eria i save gut long dispela spot.


Ol i no save tu olsem em i Olimpik spot nau na PNG i save salim tim i go pilai long ol intanesenel tonamen tu.

Olsem ol arapela spot, i mas i gat gutpela pilai graun na ol gutpela program long skulim ol manmeri long kain ol spot.

BAL: Skwas bal em i liklik moa long tenis bal.



PILAI GRAUN: Ol mak na sais bilong skwas kot.



REKET: Reket bilong skwas i bikpela liklik moa long bilong tenis.



PILAI: Barbara Stubbings i makim PNG long Komonwelt Gems long India long 2010. POTO: PNGSFOC.

2011 Telstra Premiership Dro

RAUN 4 DRO

EPRIL 1 - 4, 2011

Fraide, Epril 1

Rabbitohs V^s S/Eagles

7:30pm - Bluetongue

Broncos V^s Panthers

7:30pm - Suncorp

Sarare, Epril 2

Raiders V^s Titans

5:30pm - Canberra Stadium

Eels V^s Cowboys

7:30pm - Parramatta Stadium

Sande, Epril 3

Sharks V^s Warriors

2pm - Taupo

Knights Vs Dragons


2pm - Energy Australia

Mande, Epril 4

Roosters Vs Tigers

3pm - SFS

Bowen bai brukim Cowboys rekot



I wanpela moa gem i stap bipo long Cowboys fulbek, Matt Bowen i brukim rekot bilong klap bilong em olsem man husat i pilai planti NRL moa gem wantaim ol.

Bowen bai mekim dispela taim em i ron i go aut long pilai graun dispela Sarere nait agensim ol Eels long Parramatta stedium.

Bowen, 29 krismas, bai abrusim mak bilong Paul Bowman husat i bin pilai 203 gem bilong klap, na i pinis pilai long 2007.

Pilai bilong Bowen wantaim ol Cowboys i stat long 2001 na i bin kisim tupela bagarap long lek skru bilong em tasol em bai brukim yet rekot bilong Bowman.

Em i holim tu rekot bilong klap olsem man husat i putim planti moa train a long Mande nait em i putim

REKOT: Bowen bai putim nupela rekot bilong klap dispela Sarere.

tupela moa trai taim ol i winim Melbourne 34-6.

Cowboys kosa, Neil Henry, i tok dispela em i wanpela bikpela samting tru bilong Bowen yet na tu bilong klap.

Ol tim bilong dispela gem em: Eels: Jarryd Hayne, Luke Burt, Joel Reddy, Ryan Morgan, Etu Uaisele, Daniel Mortimer, Jeff Robson, Tim Mannah, Matt Keating, Shane Shackleton, Nathan Hindmarsh, Taniela Lasalo, Ben Smith. Intasen: Anthony Mitchell, Justin Horo, Mitchell Allgood, Carl Webb.

Cowboys: Matthew Bowen, Ashley Graham, Will Tupou, Willie Tonga, Kalifa Faifai Loa, Ray Thompson, Johnathan Thurston, Matthew Scott, Aaron Payne, James Tamou, Gavin Cooper, Glenn Hall, Dallas Johnson. Intasen: James Segeyaro, Leeson Ah Mau, Tariq Sims, Ashton Sims.

NRL Poin leda bihain long Raun 3

Pos	Klap	P	Pts	W	D	L
1	Bulldogs	3	6	3	0	0
2	Knights	3	4	2	0	1
3	Broncos	3	4	2	0	1
4	Cowboys	3	4	2	0	1
5	Dragons	3	4	2	0	1
6	S/Eagles	3	4	2	0	1
7	Storm	3	4	2	0	1
8	Sharks	3	4	2	0	1
9	W/Tigers	3	4	2	0	1
10	Raiders	3	2	1	0	2
11	Roosters	3	2	1	0	2
12	Rabbitohs	3	2	1	0	2
13	Eels	3	2	1	0	2
14	Panthers	3	0	0	0	2
15	Warriors	3	0	0	0	3
16	Titans	3	0	0	0	3

Bennett bai lusim Dragons

KOSA bilong St George Illawarra Dragons, Wayen Bennett i tokaut long Trinde dispela wik olsem em bai lusim ol long pinis bilong dispela yia.

Tasol Bennett i tok em i no save yet long wanem samting em bai mekim o wanem hap em bai go long en bihain long dispela.

Sif Ekskyutiv Opisa (CEO) bilong Dragons, Peter Doust, i tok ol i traim olgeta samting long traim na holim Bennett i stap bek tasol em yet i laikigo.

Bennett bai lusim klap bihain long em i helpim ol i winim namba wan NRL primiasip taitol bilong ol, long 2010.

Asisten o namba tu bilong Bennett, Steve Price, i winim tupela yia kontrak long kisim ples bilong Bennett.

Bennett yet i givim nem bilong Price long kisim ples bilong em na Price i tok dispela em i bikpela samting tru long



WOK PINIS: Bennett bai lusim Dragons long pinis bilong dispela sisen.

em.

Price i stap olsem asisten inap 10-pela yia na i tok em i driman long kisim dispela wok olsem kosa.

"Mi save laikim tru long kamap wanpela NRL kosa na mi amamas tru long kisim dispela wok," Price i tok.

Tasol wok bilong Price bai no inap stat yet inap long Novemba 1, dispela yia.

"Bosman i stap yet olsem na mi bai sindaun sait long em tasol na helpim em pas-taim," Price i tok.

Em i tok i gat wok yet long mekim dispela yia.

"Mi tokim Peter tupela wik i go pinis olsem mi bai no inap sainim nupela kontrak gen, dispela em wanpela tingting tasol mi mekim tasol mi no save yet long wanem hap mi bai go kos long en long 2012," Bennett i tok.

Em i tok em i no bin go long Dragons long stap long taim tasol long mekim wanpela wok na nau em i mekim pinis, em i laik lusim ol gen.

Bennett i tok em i tingting long famili bilong em tu taim em i mekim dispela tasol em i tok em i nogat tingting long go bek long Brisbane we em i winim 6-pela primiasip wantaim ol pinis olsem namba wan kosa bilong ol.

I gat bilip olsem Newcastle na South Sydney i laik kisim em tasol i nogat tok klia yet.

"Tingting bilong mi no stap long mani, sapos mi tingting long mani em mi bai no inap lusim dispela klap nau,

"Bennett i tok.

Dragons bai pilaim Knights long Sande avinun long Ausgrid stedium.

Ol tim em: Knights: Wes Naiqama, James McManus, Junior Sa'u, Adam MacDougall, Akuila Uate, Kurt Gidley (C), Jarrod Mullen, Antonio Kaufusi, Matt Hilder, Evarn Tuimavave, Zeb Taia, Chris Houston, Joel Edwards.

Intasen: Marvin Karawana, Cory Paterson, Richie Fa'aoso, Dan Tolar.

Dragons: Darius Boyd, Brett Morris, Mark Gasnier, Matt Cooper, Jason Nightingale, Jamie Soward, Ben Hornby, Dan Hunt, Nathan Fien, David Gower, Beau Scott, Ben Creagh, Matt Prior. Intasen: Michael Greenfield, Jon Green, Trent Merrin, Kyle Stanley, Adam Cuthbertson, Mitch Rein.

Nupela pes

Andrew Molen Traitim



KAMAP: Segeyaro i stap long Cowboys skwat gen bilong dispela Sarere.

JAMES Segeyaro em nupela pes bilong ol Papua Niugini pilaia insait long NRL resis long Australia.

Dispela yangpela man i bin pilai long Toyota kap resis tasol long Mande dispela wik, na nau em i go insait long Fes Gred tim bilong North Queensland Cowboys.

Segeyaro i stap long intasenis na i kam insait long namel long namba wan hap bilong gem long namba 14 jesi.

Em i pilai long huka na i kamapim planti gutpela ron long dami hap agensim ol Newcastle Knights.

Cowboys i bin win 34-6 we i lukim Johnathan Thurston na Matt Bowen i pilai tu.

Segeyaro i bihainim ol arapela bipo PNG pilaia olsem Marcus Bai, Adrian Lam, Bruce Mamando na David Wesley husat ol i bin stap na pilai long NRL bipo.

Em i stap long skwat gen bilong gem bilong ol agensim Parramatta dispela Sarere.

Bikpela tes bilong Hekari

■ i kam long pes 28

"Stars em wanpela strongpela tim na mipela bai was gut long ol," em i tok.

"Mipela i winim ol tupela taim pinis tasol asua bilong ol em long ol i no pinisim ol sans bilong ol long skoa, mipela i bin mekim olsem na mipela i win," Muta i tok.

Em i tok tu olsem tim bilong em i stap redi nau na i wetim tasol Sarere long pait long winim bek taitol bilong ol.

"Olgeta mangi wokhat long trening na i lukluk tasol long bungim ol Stars husat ol bai kam bek strong tru," Muta i tok.

Hekari gat tingting tu long go bek long O'lig resis long yia kam bihain long ol i pinis long namba tri ples dispela yia.

Hekari kosa, Jerry Allen i tok, ol i laik go bek long O'lig resis tasol namba wan samting ol i mas mekim nau em long winim NSL fainol gen.

Dispela tingting em i wanpela samting we bai strongim ol long traim na winim bek NSL taitol tasol Stars em i yangpela tim we i gat bikpela tingting na bilip long traim na kisim dispela ekspirians bilong Hekari long O'lig na tu long klap wol kap sapos ol i nap.

Sri Lanka laik givim win long Murali'

SRI Lanka i gat sans long winim kriket wol kap bipo nambawan bola bilong ol, Muttiah Muralidaran, i pinis long pilai.

Ol i winim Nu Silan wantaim 5-pela wicket long semi fainol long Colombo dispela wik.

Muralidaran yet i pilai wantaim bagarap long lek masol na skru bilong em tasol i pinisim olgeta bal bilong em insait long gem.

Long laspela bal bilong em, Muralidaran i autim Scott Styris, husat i nambawan pilai bilong Nu Silan long kisim ol poin, long 57 wantaim lbw.

Dispela i kamap namba 800 wicket bilong em tasol i no laspela gem bilong em yet.

Muralidaran bai pilai laspela gem bilong em long fainol dispela Sarere long Mumba we bai kamap namel long ol na wina bilong gem namel long India na Pakistan.



LASPELA TAIM: Murali laik pinis wantaim gutpela win na rekot bilong em.

I gat bilip olsem i nogat nara-pela pilaia bai nap long brukim rekot bilong em long namba bilong ol wicket em i kisim long Tes na Wan De kriket.

"Dispela i bin laspela gem bilong Murali long Sri Lanka olsem

na mipela olgeta i strongim tingting long pinisim gut wantaim gutpela nem na olgeta pilaia i mekim gutpela wok," Sri Lanka kepten, Kumar Sangakkara i tok.

"Em i sempion bilong Sri Lanka, insait na autsait long pilai graun, olsem wanpela man na tu olsem wanpela kriket pilaia," em i tok.

"Mi no ting i gat wanpela man i stap husat i wankain olsem em.

"Em i save mekim planti gutpela samting long mipela olgeta taim em i pilai," Sangakkara i tok.

Long wankain taim, Australia i makim Michael Clarke olsem nupela kepten bilong ol.

Dispela i kamap bihain long ol i lusim kwata fainol wol kap gem bilong ol agensim India.

Clarke i tok, dispela em i bikpela luksave na respek we ol i givim long em na em bai wokhat long mekim kantri bilong em i kamap na ron gut.

Tete Tasol

DABOL na FRI SMS!

Topup long K5, K10, K20, K50, na K100 long DABOLIM kredit blong yu!

wantaim bemobile!

Stat long tex nau! bemobile igo long bemobile tasol

Ofa bai pinis long 12 kilok biknait long 31 Mas 2011!!



Kolim Customer Care long 1555 o Emailim support@bemobile.com.pg

- Valid long olgeta topkads
- Valid long Dairek na ATM topup long fix K5 valiu (long K5 - K100 tasol) eg: 5,10,15...
- Fri SMS long bemobile igo long bemobile tasol

bemobile mipela bilong yu
Terms and Conditions Apply



Nogat inap saveman long ol provins

I NOGAT planti gutpela savemanmeri bilong spots i stap long ol provins, na dispela i wok long holim bek planti gutpela wok.

Dispela ol savemanmeri mi toktok long en, em ol teknikal ofisol bilong wanwan eria long ol spots.

Taim loa i senis aninit long ogenik loa (organic law), olgeta pawa bilong spots i go bek long wanwan provins long lukautim na ronim ol wok bilong ol yet.

Nesenel divisen bilong spots aninit long dipatmen bilong Hom Afeas (Home Affairs), long bipo i save sapotim ol provins wantaim mani long wanwan yia na tu trening bilong ol provinsol spots opisa.

Ol provinsol gavman i gat pawa long makim husat ol i ting bai nap long mekim ol dispela a wok.

Olgeta wok bilong lukautim na ronim spots nau bai stap long han bilong dispela man o meri ol i makim long mekim.

Tasol em i save bilong gavman yet long wanem kain man o meri ol i makim na sapos dispela man o meri gat gutpela save tru bilong mekim dispela a wok.

Planti yia nau mi lukluk long dispela na mi painim aut olsem olgeta provins bilong yumi nogat ol gutpela savemanmeri bilong mekim dispela ol wok is tap.

I nogat ol gutpela teknikal manmeri husat i kisim trening long wanwan eria bilong spots.

I mas i gat gutpela na planti savemanmeri bilong spots i stap long ol provins bai ol i ken lukautim na ronim gut ol samting long LLG level i go daun long distrik level wantaim.

Ol savemanmeri em i namba wan samting we i mas stap long ol provins long helpim spots i kamap na strongim developmen bilong en.

Sapos i gat dispela ol gutpela savemanmeri stap, em bai wanem ol samting gavman i givim i go long mekim dispela wok, bai go stret long helpim ol manmeri long distrik na LLG level.

Dispela em wanpela samting we i no stret yet olsem na ol manmeri save wetim na karai yet long gutpela sevis i go long ol long ol provins.

Gutpela wok bilong gavman, lukautim na ronim gut ol samting na tu gutpela plening o tingting i go pas long mekim samting i stap, em bai gutpela developmen i ken kamap long ol distrik na LLG.

Em i tru, spots i save gat bikpela wok long ol manmeri long grasruts level.

Planti bilong ol dispela em ol yangpela manmeri olgeta hap long kantri.

Tasol ol manmeri husat i kisim wok long lukautim na ronim spots long ol provins i mas kisim gutpela trening na i mas i gat ol samting i stap long mekim wok bilong ol long distrik na LLG level.

Dispela ol lain i mas mekim olsem ol profesenol, o i mas wok olsem dispela em i wok mani bilong ol.

Wok olsem menesa bilong spots i min ol kain wok olsem lukautim ol pilai graun na samting bilong pilai na trening, ronim ol kompetisen, helpim long lukluk long ol arapela hevi bilong komyuniti, kamapim trening bilong ol etlit na teknikal ofisol, wokbung wantaim ol skul, sios na ol meri na yut grup.

Husat i kisim dispela wok i mas i gat save na pepa bilong mekim bilong wanem em i no isi na bai gat planti salens tu.

Yumi save pinis long wanem kain ol bikhet pasin i save kamap insait long ol komyuniti taim i nogat gutpela savemanmeri o meri stap long ronim gut wanpela spots opisa.

Ol provinsol edministresen i mas trening na lukluk gut long ol savemanmeri bilong lukautim spots bilong ol.

Sapos dispela i no kamap bai provins i stap 50 yia bihain na ol narapela bai go pas.

Long kisim moa save long ol trening, ringim wanpela long ol rijinel opisa bilong mipela; POM – 325 1991, NSI – 732 2391, Momase – 479 1029, NGI – 982 5052.

Stia tok bilong Besta FC

Andrew Molen i raitim

NESENEL Soka Lig (NSL) bilong dispela sisen bai pinis nau, tasol kepten bilong Hekari, David Muta i givim sampela toktok we i ken helpim yangpela tim bilong kompetisen i kam bek strong long narapela yia.

Toktok bilong Muta i go long Besta United FC we planti ol anda 20 pilai bilong Papua Niugini stap long en.

“Ol i mas lainim long noken belhat nating na tingting tasol long pilai soka, noken lusim ol arapela pasin na tingting i bagarapim ol,” Muta i tok bihain long gem las wik.

Hekari bin pilaim Besta long semi fainol we i lukim ol bipo O’Lig sem-

pion i winim gem 5-1.

“Mi amamas long strongpela spirit bilong ol long i no giv ap tasol long pait yet inap long gem i pinis.

“Tasol mi laikim bai ol i mas kamap olsem ol profesenol pilai na pilai wantaim strongpela tingting na i noken lusim ol liklik samting i mekim ol i kros nating o bikhet insait long gem,” Muta i tok.

PNG nesenel soka kosa, Frank Farina, husat i bin lukim gem las wik tu i tok amamas long strongpela gem bilong Besta.

“Mi tingting ol i pilai gut tete, em i no isi long ol yangpela olsem i pilai agensim kain tim olsem Hekari na mi tingting 5-1 em i no nogut tumas.

“Ol i ken apim het bilong ol na amamas long strongpela pilai bi-

long ol long hia tete, Farina i tok.

Em i tok tu olsem, PNGFA i gat gutpela tingting long putim dispela tim insait long NSL we i ken helpim gut long developim ol yangpela pilai bilong kantri.

“Dispela i ken givim ol planti strong na ekspirians na ol i ken bilip moa long ol yet na gem bilong ol,” Farina i tok.

Em i tok tu olsem ol i no makim nesenel skwat bilong PNG yet tasol ol bai mekim dispela bihain long NSL i pinis.

“I gat 4-pela mun i stap yet na mipela bai wokhat long redim tim bipo ol i go long Pasifik Gems long Nu Kaledonia long Ogas,” Farina i tok.

Sumatin em namba wan wina bilong NRL fon resis

JESSICA Philip em namba wan wina bilong “NRL Tipping Competition” bilong Digicel.

Em i kisim K2, 000 long Digicel bihain long olgeta tim em i makim long NRL las wik, i bin win.

Philip, bilong Hagen, em i wanpela sumatin long Yuni-vesiti bilong Papua Niugini na bai kisim digri bilong em long Turisem na Hospitaliti (Tourism and Hospitality), long Epril dispela yia.

Em i tok em i no wanpela bikpela sapota bilong ragbi lig tasol, em i bin laik traim save bilong em na i laki

long win.

Philip i tok planti bilong dispela mani bai go long ol wok redi bilong em long greduesen bilong em.

Dispela resis i save kamap olgeta wik taim NRL i save kamap we ol manmeri husat i gat Digicel fon i ken salim nem bilong ol tim ol i ting bai win i go long 1680.

Kos bos bilong wanpela teks o sms i go long dispela namba em K1 tasol husat i win i ken kisim K2, 000 olsem Philip na tu moa long K10, 000 long pinis bilong sisen.



WINA: Kastoma kea menesa bilong Digicel, Vetau Roga (Iephan) i givim sek mani long Philip las wik Sande long het opis bilong Digicel long Mosbi. POTO: Digicel.



GO LONG HAILANS: Olgeta provins bai salim ol tim bilong ol igo long Goroka bilong nesenel sempionsip dispela yia.

Sofbol sempionsip bai go long Hailans

NESENEL Sofbol Sempionsip bilong dispela yia bai go long Hailans.

Dispela bai namba tu taim bilong tonamen i go long hap bihain long 8-pela yia.

33 tim bai kamap long dispela tonamen we bai lukim 4-pela i kam long Goroka yet na tupela bai kam long Hagen.

“Dispela bai bikpela namba tru bilong ol tim i stap insait long wanpela nesenel sempionsip,” Bais i tok.

Bais i tok amamas tu long National Gaming and Control Board (NGCB)

husat ol i givim K60, 000 long sapotim dispela tonamen.

Dispela yia, ol i givim K10, 000 moa antap long mak ol i givim long 2010.

“NGCB i sponsaim dispela tonamen long las 5-pela yia na mi amamas long ol i helpim mipela gen,” em i tok.

“Mipela i amamas long sapotim spots na mipela i lukim ol olsem ol patna we mipela i ken wokbung wantaim,” Sif eksekutiv opisa (CEO) bilong NGCB, Simon Sanagke i tok.

Bais i tok Sofbol i save gat nesenel sempionsip olgeta yia long taim em i stat yet inap nau.

“Dispela yia bai namba 36 nesenel sempionsip,” em i tok.

“Mipela i tingting long kisim i go bek long Hailans bilong wanem tonamen i no kamap long hap longpela taim na mipela i laik ol manmeri long hap tu i ken amamas wantaim mipela,” Bais i tok.

Em i singaut long olgeta provins i mas traim long salim wanpela tim i kam long dispela tonamen.

Pait bilong Stars

Bikpela tes bilong Hekari

Andrew Molen i raitim

EASTERN Stars i gat bikpela salens taim ol i bungim Hekari United long NSL gren fainol dispela Sarere long Mosbi tasol long wankain taim, em i bikpela tes bilong Hekari tu.

Dispela bai namba wan NSL gren fainol bilong ol Stars na wanpela man husat i ken go pas long pait bilong ol em kepten, Cyril Muta. Cyril em liklik brata bilong Hekari kepten, David Muta na dispela bai namba wan gren fainol bilong em long pilai agensim olupela klap bilong em.

Em i bin pilai olsem wanpela beklain difenda bilong Hekari bipo em i go long Stars long las sisen. Nau Cyril bai sanap agensim bikpela brata bilong em long train na rausim NSL trofi long em. Em bai bikpela salens bilong ol Stars bilong wanem i nogat wanpela NSL tim i winim Hekari yet taim kompetisen i bin stat long 2008 yet i kam.

Stars i soim bikpela senis long stail bilong gem bilong ol, pasin bilong harim tok o disiplin na tingting na pasin bilong ol profesenol pilai. Dispela em sampela kain ol pasin

we i wankain olsem Hekari na sampela manmeri tok ol i wok long bihainim piksa na rot bilong Hekari.

Stars i gat sampela ol ovasis pilai bilong Solomon ailans tu tasol bikpela salens tru bilong ol nau em long train na rausim dispela taitol long nambawan tim bilong PNG. Dispela gem tu bai bikpela tes bilong Hekari bilong wanem ron bilong ol dispela yia i no bin gutpela tumas.

Planti pilai bilong ol i bin kisim bagarap bihain long ol i kam bek long klap wol kap na gem bilong ol i no strong namel long yia.

Tasol lek bilong ol i wok long painim gol yet wantaim bal na dispela i helpim long kisim ol i kam long fainol wanpela moa yia gen.

Hekari bin winim Stars tupela taim long ol gem bilong ol long dispela sisen tasol kepten, David Muta i tok ol bai no inap malolo inap gem i pinis.

Moa long Pes 26.



POTO: ANDREW MOLEN.

SALENS: Stars bai givim gutpela salens long Hekari long fainol dispela Sarere long Mosbi.

Skwas em susa gem bilong tenis.

Pes 24

Vanimo winim sef taitol long Madang.

Pes 26.

Stia tok bilong Besta U20 tim.

Pes 27.

Johnston's Pharmacies



For First Aid Kits. Red8 Body Bulk Protein Supplements. Thompson Vitamins, Bandages, Strapping Tape, Mouth Guards.

All Sport and First Aid requirements.



P.O.Box 1066 Boroko. Phone 325 3185. Fax 325 0190. Email sales@johnstons.com.pg."